

止
堂
集
三



止 堂 集

(三)

彭 龜 年 撰

王雲五主編
叢書集成初編

止 堂 集
三 冊

中華民國二十四年十二月初版

章

撰 者 彭 龜 年

發 行 人 王 雲 五
上海河南路

印 刷 所 商 務 印 書 館
上海河南路

發 行 所 商 務 印 書 館
上海及各埠

止堂集卷十三

啟

答柳州吳守啓

疏恩易地。乃落衡山之南。開府承流。又作殊方之喜。教不易俗。人易以孚。恭惟某官。抗志高明。受材僂偉。人物爲當世之最。議論居諸子之先。校中祕書。聲問籍籍。入御史府。步武駸駸。爭子所不于盤之中。堪嗟朝市之路隘。得此州又在嶺之上。卻思父老之情親。想應田里之安。不待教條之出。蛇膺褒詔。趣覲明廷。某久闊晤言。方深瞻想。見王言如絲而出。喜不後于他人。拜使君治鹵之勤。意甚慚于記史。其爲報謝。未易形言。

通宜春徐知縣啓

去父母之邦。眞成漫仕。宰山水之縣。乃有令君。豈不畏筮楚之徒勞。以嘗侍几杖而甚喜。去違滋久。方切候臆之心。眷予特深。不忘烹鯉之惠。以至于問勞之語。每見之故舊之書。飄然而來。恃此不恐。恭惟某官。行能高妙。議論通明。尋常瀆豈容吞舟之魚。九萬里斯展垂天之翼。乃小試惠綏於巖邑。以養成經濟之壯懷。當路見之。無異東湖之孺子。一朝掀舉。必興太末之名家。某才拙無堪。志迂寡偶。誤玷明經之舉。遂爲游徼之官。需次六年。始能問戍。相望累驛。行途趨風。輒修駢儷之文。先寓毫分之敬。得事君子。固將思

濟斯民。敢有他心。徒使惠歸一尉。

迎臨江葉守啓

需次近畿。輒臨偏壘。顧賢者澤民之志。易地皆然。而聖主念遠之心。一見決矣。人隨所用而重。公豈遽輕此行。雖君子欲無疾其驅。然小人嘆其來何暮。恭惟某官。受材膚敏。毓德溫醇。大振家聲。見石林先生之有後。小脫囊穎。如海沂別駕之可歌。何自爲州。聊以重國。地無大小之異。事關根本則同。如漢以二千石安庶民。實爲親切。得結輩十數公置天下。藉以撫綏。豈惟布德意于斯人。抑亦啓遠圖于今日。但恐開藩之未久。定應乘駟以過歸。某惕然念咎于里中。幸甚占籍于麾下。已從道上。望太守之行春。將飲田間。誇新尹而作社。

上袁州汪守啓

以祿代耕。甘爲奔走之吏。及瓜請戍。獲從慈惠之師。夫豈偶然。殆有相爾。當輦車之就國。適出敝郊。擁篲箠以趨風。已償素願。惟名分之際。嚴而有節。故啓問之禮。禁不得修。至于馳慕之深。曾無食息之間。慙非孺子深恐後期。幸與斯民得依先覺。恭惟某官。秉義醕壹。蓄德雄剛。廉潔自持。如出清冰于萬壑。功名孰禦。當翼疾風于九閔。夫何斂天朝之羽儀。爲王國之蕃翰。以望重固宜于寄遠。而才難尤在于承流。芮憑之來。冕旒亦喜。憂顧寬于千里之外。惠澤暢于九重之前。白粲連橋。爭出秀江之險。黔黎羣誦。始識春臺之溫。于是回昌黎難繼之政聲。自此昌龍溪未盡之功業。豈惟石刻。列父子以俱榮。當啟金甌。見姓名之

特起某跡寒與寡才短用疎嗜好不與俗侔幾爲衆笑樸魯未諳世故安免人非況後使之宦遊必不逃夫吏議雖欲安甘旨之奉何以無酸寒之憂如履垂堂幸依廈屋民皆感德固已負于鉏鉤吏亦可勞或少寬于篋楚

迎袁州李守啓

誕揚明詔特起舊臣自辭烏府而來皆期大用忽擁虎符而出以惠遠方惟賢哲之一心視內外無異體盡宣王化如在本朝恭惟某官直氣塞天地之間貴名如日月之起志意慷慨真有前輩之風議論通明盡識當世之務暫撫綏于蠻獠繼饋餉于邊屯皆枉壯圖甚乎公論遂乘一節之召入居三院之榮當驪龍處深淵之中莫撓其怒而鸞鼠伏神丘之下竊弄其機非藉公言孰振士氣忽焉去國何以正邦屬九重以四方爲心擇大賢任千里之寄維宜春之古郡甲江右之列城珥筆之風猶未銷于舊俗懷鉛之士終莫抗于他都必復得如韓文公之才庶幾可跨漢良吏之治暫紆紫綬斂大惠而施一州卽下白麻佐天子而令四海某得一職百僚之底當歷年積弊之餘惟近民故易以擾民求禦盜而適以滋盜晷月于此中心惻然欲寡過而未能方內省于不疚竊仰二天之庇實殫此心輒繼兩月之歌以爲尺牘

迎袁州守啓

丙申春

制出右掖恩頒左符方郡守之數更不知爲政忽賢者之鼎至皆喜得人百吏聞風一意聽命恭惟某官才周世務識照事幾立志不後于古人所學皆傳于先世舉相國中興之業莫比勤勞數本朝名臣之家

無此忠義。臧孫有後。孰不謂宜。周公拜前。當有繼者。何望重尙。煩于寄遠。以才難政。在于承流。況宜春之古都。爲江右之劇地。民甚貧而賦必豫出。財愈竭而用不可支。故今日聞我公之來。如向者望長君之至。雖夏侯兄弟之政。不復能使二難之并。然南陽父母之賢。皆云可以一舉而得。凡此邦之利病。當卽日而罷行。第恐鋒車。不容暖席。某才窮五技。官尾百僚。未能免酸寒之憂。何以爲甘旨之養。至于曠職。尤切關心。如履垂堂之危。偶近厦屋之庇。民皆感德。固已帶于鉏鉤。吏亦可勞。或少寬于箠楚。

上袁州張守啓

不材漫仕。幸依大府之仁。藉庇終更。敢起故鄉之念。願圖報之心。用酬萬一。而丐歸之請。已及再三。自當去就難處之時。可不反覆極言其故。豈得已不已。而冒瀆尊之罪。蓋可言不言。則負知己之恩。宜賤子之具陳。幸閣下之垂聽。伏念某。身勤事左。意廣才疎。未能嗜世俗之酸鹹。自分田野。無以奉親庭之甘旨。妄意科名。偶得一官。來遊大國。迄今三載。所事數公。靳塞譴責。而未能。雖有建明而莫可。自登鈴閣。卽蒙特達之知。凡有瞽言。必荷委曲而受。不堪器使。且辱甄收。未知結草之効。忠忽已及瓜而受代。身雖離于職業。心甚切于門牆。敢思故國之似人。遂若小民之懷土。深惟孤植。早失過庭之嚴。獨侍偏親。久重倚門之望。比聞安問。必詰歸期。雖無君子所去之三。已犯天下大戒之二。況人情不美。其反也寧免爭席之疑。且餽問鼎來。不知者必有爲肉之謗。豈小嫌而遑恤。亦此心之未安。自非高明。孰可鑒照。恭惟某官。溫恭逮下。慈惠愛人。充此仁心。無一物之不體。極其功用。運天下而有餘。顧在冗散之中。最荷眷知之厚。凡申懇

款必辱聽從。輒控此情。仰祈終惠。何必懷此都也。敢言賈誼之言。雖然豈舍王哉。當學孟子之學。

謝袁州張守啓

薄宦多奇。偶依大庇。薦書再上。實出異知。無以堪承。惟深悚懼。伏念某。乏冲和之器質。無廣大之胸襟。狂直之言。發必忤物。狷介之行。大似絕人。皆由氣質之偏。幾作生平之累。豈堪遊宦。何以奉甘旨之歡。雖落冗僚。安敢起酸寒之歎。得事約束。固已幸矣。屢加薦論。夫豈偶然。載攷前聞。實爲希遇。如束之用。不止于司馬。故狄公再薦于唐朝。若韓信才真。可以將軍。故蕭相數言于漢祖。是皆非尋常備數之舉。所以待超卓不羣之賢。詎可非才。使當此選。一顧增三倍之價。人固已疑。兩薦多溢美之言。誰能不感。雖嘗志古人之學。亦常聞長者之譚。政以識趣之不明。莫知所主。未免邪正之交勝。何以自修。色厲內荏。則固不敢爲。外粹中剛。則安能盡信。辱探過情之聞。列爲借譽之辭。彼人言之謂何。顧自揣亦愧甚。恭惟某官。仁無一物之不體。明照萬事而無遺。理劇撥繁。視天下若不足治。博詢下問。于人言無所不從。遂令狂妄之人。容在使令之列。不獨優其慙直。又重借以吹噓。自幸此生。有是知己。某敢不勤其未學。收此放心。有如門牆。安用添身之報。誓修德業。以酬青眼之知。

上吉州太守啓

貳令巖封。慙無稱塞。庇身大府。得所稟承。顧不肖冒爲此來。在今日若有幸會。踉蹌拜賜。俯偃効官。伏念某。材技無他。氣稟甚下。習俗熏染之病已痼。學術揩磨之功不深。中無所存。動輒有過。得一官于斧藻文。

詞之末竊寸祿于簞楚塵埃之間。位雖近民。道不及物。每見近世寡過之士。間毀節于宦遊。常恐至愚極陋之人。或負慙于長者。屏居閒處。乃當其分。承事大邑。則非所宜。寧以位偏之爲嫌。蓋憂責重而難任。使之趨事。雖云奔走出入而笑辭。與其擾民。豈若拜起送迎之無過。欲處此而盡道。敢率爾而曰能。儻不得大賢爲之依歸。何以使後生知所循守。茲蓋伏遇某官。任古侯伯之寄。委有民父母之慈。祥與屬吏委曲之言。皆仁心惻怛之意。謂縣官取財之道。固亦有經。而邑隸斂怨于民。反以諉郡。方當凶歲。振恤之不給。豈容黠胥掊刻以自豐。俾之改轍而更圖。是以弛因而示指。遂使賤屬得布宜寬大之訓詞。致令編氓皆仰望蠲除之號令。某敢不敬佩教戒。誓償奢知。肯飾諛詞。徒効世俗事大之禮。苟有愚見。當自此日悉意以言。希寬犯分之誅。庶展報德之念。過此以往。不知所裁。

上吉州向倅啓

辛丑

拜題輿于便道。嘗慰夙心。竊大廈之餘陰。偶隨屬吏。念一時教誨之語。歷再歲往來于懷。趨參無期。惆悵自恨。忽聞分刺。少仲騏驥之才。獨後衆人。仰致燕雀之賀。逮此每日。惕然一心。因請戍之有期。敬列過而自訟。恭惟某官。氣勁直而不撓。才酬酢而有餘。自文簡累世于今。見此英偉。數先正大臣之後。多躋顯榮。未應郡丞。猶屈賢者。官固無小。況二千石之同流。道若可行。則十萬戶之蒙福。斯人久屬意于此。君子亦隨時應之。治功方來。相業茲始。某酸寒下土。苦窳凡才。一官償燈火之勤。三載困塵埃之辱。偶占數清江之上。得問學薌林之門。于是竊聞前輩之風規。每恨未盡故家之文物。識公幸矣。足以爲終身之榮。非天

相之。何以託今日之庇。

上憲使啓

偶紆黃綬。慙無任職之能。竊仰繡衣。喜有庇身之所。趨風雖舊。爲隸則新。每不敢以訊問寒溫之書。仰瀆記室。自此始有遵承約束之地。故達賤名。惟負率爾之慙。益作赧然之色。伏念某孤志不侔于俗。百拙無庸于時。未能鑿方而規圓。是宜進寸而退尺。得効官于一邑。凡需次者六年。深欲奉甘旨之歡。恐未脫酸寒之累。至所職掌。況無紀綱。以近民故。易以擾民。求去盜而適以爲盜。名爲教閱。徒應虛文。但事奔馳。以供私役。當習俗剽悍之未化。有山川險阻之可依。未免弄兵。安能禦侮。乃位以謬庸之吏。豈免無藏曠之憂。自顧此行。何恃不恐。茲者伏遇某官。道不絕物。志在濟時。誕布寬恩。不憚驅馳之苦。能令歉歲。亦無攘奪之風。非惟稱部使者嚴重之名。蓋不負聖天子臨遣之意。豈期疎遠。得在使令。某敢不恪意奉公。修身報上。愛人利物。誓殫一日之長。藏垢匿瑕。敢恃二天之庇。

上江倉漕啓

伏以歲惡及饑。官無委積。民貧待哺。地阻轉輸。偶聞鄰邑之可依。敢以有司而不告。竊以社倉之制。本蓄之村疇。近世以來。多斂之州家。每當給散之時。倍有將運之費。然河內乏食。梁王猶盡移粟之心。晉國阻飢。嬴氏亦有泛舟之役。蓋方抹百姓之不暇。豈復以異地而爲疑。重念高安之黎民。悉居錦水之窮處。自辛卯而後。率三歲而一旱。故挈境之民。幾十室而九空。一或值于凶年。皆仰給于公上。嘗大計其粟。至費

四萬餘斛之多。然遠取之州。乃歷三十六陂之險。既已遡洄之不易。復當急漲之可虞。維萬載之爲郡。與二邑而錯壤。儲穀甚富。至于陳陳乘流而來。不俟信信。自可推盈而抹乏。豈宜舍易而就難。況令甲有移那之文。而仁人柄補助之政。可懼煩瀆。而不控陳。恭惟某官。學問不爲空言。器識足了大事。平生有致君之念。未究毫分。所至以愛民爲先。此亦梗槩。不煩矯節。能解倒垂。某奉檄拯荒。畢力無術。幸逢大使。無越人視秦之心。僭以尺書。希孟子發棠之念。仰祈矜恤。俯慰凋羸。庶令屬邑之微官。能布使臣之大惠。

上留帥丘漕啓

幾月不雨。亢陽爲災。惟江南卑薄之鄉。豈堪此頻歲之歉。而斯民生死之命。乃決于數日之間。爲國而憂。非公孰望。竊惟凶年拯揀之術。嘗聞古人講貫之詳。十二政創見于太平之書。數百條備著于常平之法。觀其惻怛軫卹之意。與夫曲折周防之文。得人舉之。有此足矣。惟是今日之事。頗視昔者而非。細數十年之中。凡遭旱潦者。至于七八。熟察一路之郡。號有蓄積者。僅留錙銖。河東之民。已不可移。宜曲之粟。殆亦告竭。何異廢痼之初起。又嬰寒暑之交侵。氣既不完。藥終難用。然而仁人愛物。常圖之未已甚之先。天下事機。豈至于不可爲而止。間多補助之計。亦有豫備之謀。使旣雨。則民物蒙休。而或旱。則内外有恃。咸歸盛德。以惠遺黎。恭惟某官。負宇宙魁奇之名。稟乾坤溫潤之氣。將天子之指。欲推之鰥寡孤獨之微。爲若人而謀。不啻如父母兄弟之切。遇有歲凶之事。尙來下問之勤。某眇焉無庸。幸甚受察。偶得斂尺版趨拜于下。蔑所建明。輒敢援一方利病之言。少佐施設。

迎李泉使啓

攬從輔郡出擁輅封至九府圖法之傳至今大敝故一札細書之出藉公非輕觀其遲遠業而爲此除可以見上意之有所在輒敢臆度其說而以敷陳于前嘗攷三幣之置官蓋從中古至總數路而置使則由本朝然昔者兼之他司而嘗收奇羨之功于近歲分爲兩臺而猶負采鑄之課得非天地之藏有限取之已多不曰國家之用無窮責之益亟故漬鐵以取銘抑已巧矣雖更錢以助國猶未裕如非有宏博之才孰識變通之道恭惟某官文出胸中之渾厚學非紙上之拘攣視天下事無煩簡劇易之不周置諸公間以獻納論思而甚允嘗締班于九寺旋分節于三官人皆惜設施之未允士已知經畫之已立然而勢不窮則不變利有盈則有虛錢不憂乎鑄之少而憂夫泄之多銅不貴乎采之衆而貴夫用之狹此固高明之深察諒非世俗之所知某荒僻謏聞迂疎凡質學徒泥古而背時趣行欲徇世而與心違自宜揣分以安貧乃復爲養而貳令屬以此邑嘗置治官伏自省員以來使之督課初乏兼人之智可備曠僚偶究觀其始終乃竊聞其利病幸承要束輒敢肆言不得卽賀而以書已爲非禮又復出意而論事真可謂狂

賀江西趙鹽臺啓

誕布絲綸趣頒英蕩諸道置使號天子之外臺一時掄才必海內之人傑久傾羣聽欣得我公恭惟某官議論該明行能高妙進官早達赫赫乎名之隨風遇事無難恢恢乎力有餘地當曳履星辰之表乃持麾江湖之間竊惟本朝以來最重監司之寄然轉運刑獄各列一職惟常平茶鹽兼總二權自熙寧始創此

司。在江右尤爲劇任。蓋今之大農。方且藉山海之利。而前日羣寇。因此貽廟堂之憂。或者疑漏網之不修。而未知有覆轍之可戒。雖金穰之歲。可免他虞。然火耕之民。本無常產。豈不資補助之德。使之忘俯仰之憂。惟于優游閒暇之中。始息奸宄寇攘之念。此朝廷所特爲一方之託。而父老亦深喜大賢之來。以次用之。故位王人諸侯之上。又有大者。將舉明王三代之隆。某眇焉宦遊四方之初。幸甚屬吏一人之數。竊聞弭節之已久。屬以詰封而未還。不得卽賀而以書。已爲不足。儻責後時而廢禮。何以自文。

止堂集卷十四

啟

賀江西錢漕啓

明廷疏寵。廷閣陞班。賞當其功。人爲之喜。某竊謂君子不以非分之受爲義。吾人貴乎不妄。以予爲公。惟受之以義。故不敢忘皮冠之招。惟予之以公。故不敢徇繁纓之請。方聖天子申薦賞之令。而部使者策將漕之勲。名視實而不浮。位因人而愈重。恭惟某官。以有用之學。發名世之材。入侍禁廬。已罄論思。獻納之益。出總外計。洞知本末。源流之歸。今天下之利。盡取以無餘。而大農之官。猶以爲不足。當國家閒暇。而若此。則軍旅調發。且奈何。屬前日羣竊之緩誅。徵諸道勁兵。而皆聚。孰出木牛之智。少紓汗馬之勞。佐軍而常操贏資。卒藉劉士安之術。給餉而不絕糧道。莫償蕭相國之功。果聞異數之亟來。徑陟清資。而益峻。以盜賊所傷殘之地。值朝廷加寬大之恩。蠲租賦以予民。招流亡而復業。固明君屬望之深者。必大賢加意以圖之。某敬爲斯民。慶此實惠。盡宣德意。旣無遠之不通。嗣聽褒嘉。將繼茲而又賀。

賀江西趙漕啓

祇奉細書。出將隆指。諸道置使。所以舉天下之大綱。九重掄才。必以委當代之人傑。舉國相屬。非公其誰。竊以本朝自創外臺以來。首以轉漕爲重。豈獨權財穀于公上。吏不得私。亦恐紊賦斂之經常。民無所措。

乃或者不推其本意。居是官。必浚其利源。如向來軍旅之輸。多一時權宜之制。云何月椿之目。至今尙存。遂使江右之民。其生益削。旣朝廷征取者無藝。故州縣因緣而爲姦。能趣辦者皆謂之才。有遠慮者莫適爲計。勢旣窮矣。後將奈何。必得大賢。以起斯弊。恭惟某官。學窮根柢。德茂本支。嘗對大廷。以六經爲諸儒之倡。謂持此道。舉明主于三代之隆。向自著庭。出分便郡。復將餉輓之節。甚鬱經濟之懷。然當俗吏以苛急治財。而得賢者。柄取予于上。人知趣響。遂令義利較然。民嘗困窮。始決安危如此。以今日施爲之桮槃。卽異時輔相之規模。某竊以箠楚之官。窮居英蕩之下。行服條教。如親見于古人。敢飾諛詞。以誑取于執事。

賀江西李漕啓

誕布綸言。就須籌節。躋榮廷閣。豈徒示天下之美名。增重計臣。所以踵皇華之故事。輶車至止。屬部交歡。恭惟某官。才足經綸。學有根柢。一時文采。重新西蜀之山川。百世風流。復見大蘇之父子。嘗舉列聖之鉅典。以爲長編之一書。視魏相奏漢家之便宜。惜乎未盡。笑孫樵讀開元之雜報。杳不可知。挈此規模。獨出今古。殫其心志。以報國家。雖衣繡之出。甚榮。而畫錦之歸。可樂。不忘修纂。遂克奏陳。皆擬簪筆綴甘泉之班。乃復持節。按勾吳之境。惟時使事之繁劇。莫若漕臺之轉輸。自兵與農分爲兩途。而國與民幾于交病。三十鍾而致一石。其費謂何。五千服之賦中邦。半糜于此。非得道術通明之士。莫求上下充羨之方。當有奇謀。不愧流馬木牛之運。伫開遠業。遂爲騎麟翳鳳之遊。某生而慙愚。出于僻左。承師問道。本無尺寸之

長應舉覓官偶出權衡之下。嘗乘退朝之隙。得償進謁之心。自去門牆。寢疎啓問。欣聞將命。已遂觀風。幸儕奔走之隸人。得受約束于下執。輒修尺牘。庶少紓廈燕之情。尙冀小材。或可從柏馬之計。

賀江西丘漕啓

恭審詔自便藩。使以隆指。君臣道合。初不俟臨遣之煩。遠近意傾。固已切諮詢之望。然惠一有施。斂之異。則人不無去留之私。忽聞載馳。方覺增喜。竊以自禹任士。而荆陽之賦最下。繇唐至今。而東南之利遂窮。張文定當天下安集之時。始能去水場賦錢之橫。王文正于太平全盛之日。固已憂朝廷權利之深。近攷數十年征斂之科。豈止三四倍疇昔之取。而況水旱之災。幾于數矣。公私之積。大率枵然。無異衰病之人。重撓寒暑之變。惟國家固以此地爲根本。安得不憂。輟賢能以振外臺之紀綱。可見此意。恭惟某官。學極精微。而有用行非崖異。而能高。文袞袞如萬斛之泉。與古爭列。才恢恢有遊刃之地。遇事不留。雖晉用之遲回。而培養之深厚。一陪右府。幾微之論。屢分左符。鎮撫之勞。理效輒聞。知眷獨異。謂遡江而上。得兼治直。差易耳。故倣漢之制。選所表以次用之。不惜一世經綸之才。以重十州漕輓之寄。惟計臣自當識本末源流之所在。非良弼不能明弛張取舍之大機。幸公之來。乃國之福。某學無自得。才本不長。繇進士而得官。已踰一紀。奉偏親而竊祿。偶落旁州。方沿檄掾荒而還。適乘輅將令而至。遂偕屬吏。同拜下風。儻得奉條教而言歸。豈不甚幸。又復出意見而論事。直可謂狂。

賀江西尤漕啓

夙擁使華。遠將帝指。方天下以治財爲急。其術已窮。以儒者而經賦其間。此意可見。民得所託。國以不輕。竊惟大江之西偏。實爲今日之外府。月椿之輸。殆七百萬。大半皆無名之征。中興以來。踰五十年。幾倍于昔者之賦。名爲和買。而責以折納。旣用差法。而復釀傭錢。茶有稅而。又斂其租。酒盡榷而。或誅其直。至詳經制之目。尙持除陌之籌。此皆公取之可稱。猶有旁緣而莫攷。顧張弓安可以不弛。而漏卮每苦其難盈。不有仁人。孰識大體。恭惟某官。博取百家。而不雜。獨立一世。而能和。發爲文章。復還三代之淳古。措諸事業。無非六籍之精微。自結睿聖之知。亟升中祕之地。以志大不輕于進取。故才高寧屈于拊循。旋被絲綸。出持英蕩。以勞來還定之政。固江東王氣之神。于倥偬不給之中。增廬阜文風之勝。觀其施設之不苟。可知經濟之有餘。尙屈此行。皆以爲枉。然而利有盈則有縮。勞不極則不更。由後視前。取之旣多。自今圖往。安可不亟。于是培國家之根柢。寧不在公。行且作朝廷之羽儀。豈久處此。某氣稟甚下。材技無他。幼矜斧藻之詞。以覓官。壯持簿書之智。而竊祿。每慙數誤。莫究昨非。久仰指南之車。無異必東之水。偶負丞于支邑。乃受察于隸人。不得卽賀。而以書。神如馳馬。又復出意而論事。癡若拊騶。

謝宰執啓

遠方隨牒。久懷就養之私。眞館奉祠。忽遂由衷之請。雖天地造化。不遺于一物。而斗筭器局。莫堪于大恩。詞則有窮。感無以狀。竊以介之推。不忍一言于晉。寧與親而俱逃。陳仲子不義萬鍾于齊。乃離母而獨處。然當世不以之推爲不孝。而君子至謂仲子爲非廉。蓋義不當就。則飲菽而亦歡。情當其可。則捧檄而爲

喜欲識人子何以爲養。必知聖門所謂不違。如某者。行落落而與世乖。學拘拘而求古是。自爲士已懷四海之慮。不敢作無用之言。及居官而效一日之長。未嘗爲苟免之計。惟念親年及耄。子職非耕。詰盜四封。屢歎杖杜征夫之遠。貳令一邑。尤懷北山從事之勞。每當出身徇節之時。必有臨深登高之懼。屬宰改秩。當更字民。豈不知積資循進之足貪。誠恐失先意承志之可樂。故申將母之諗。以希錫類之仁。國爾忘家。公爾忘私。事上者固當如此。忠移于君。順移于長。觀人或是得之。敢意大鈞。亦軫微類。恭惟某官。貴尊三事。和育羣生。德盛自發于威儀。功深不露其形跡。知愛其親。而達之天下。不被其澤。如納之溝中。切揣甄陶。固能益子華五秉之粟。許參祠館。蓋已察曾子三釜之心。某敢不退事其親。自竭其力。無從倒戟。空有翳桑遺肉之懷。安敢爭車。少替潁谷請羹之念。從今養志之日。無非報德之年。

再謝宰執啓

苟祿養親。未能隨牒。因心錫類。又許奉祠。雖播物之無私。若拜恩之獨厚。莫任造化。有覲面顏。伏念某。逮齟齬而已孤。長髮膚于其母。去賈區而使學。其教甚勤。惟子職之非耕。所養或闕。適當壯歲。偶得一官。遊宦旁州。僅免尸饔之歎。小出數日。尙關噬指之憂。煢煢如形影之相依。惴惴懼旨甘之不繼。惟古者八十舍從政之子。而近時稠疊推優老之恩。未免並緣。以致懇請。薦容冗食。仰事慈顏。俾于一喜一懼之年。有以自老。不待再仕再化之後。而得此心。可謂倖邀。敢忘攸自。茲蓋伏遇某官。計安天下。澤潤生民。自寅亮調燮之中。發正直平康之治。欲佐天子。得歡心以事其親。遂使匹夫。無常職以食于上。某敢不敬竭饘醢。

之力以當香火之緣。永懷趙孟遺母之心。無以報德。雖在李密養劉之日。不敢忘君。

謝張尚書啓

微官脫選。今以爲難。小己逢辰。人知獨異。施厚者未易語報。感深者不容以言。試具陳之。則可睹已。伏念某身勤而事左。意廣而才疎。每讀書必欲求志士仁人之心。自爲士已不屈王公大人之下。顧如愚戇褊急之累。在性質可謂之偏。而其琢磨澄治之功。于師友未有所得。出而接物。動輒忤人。終雖察其無他。始未免于不樂。平生知己。焉得如公。四海閱人。抑安取此。才非敏健。而以爲可任。智多昏塞。而引之與謀。言雖妄而亦容。事可行則立決。在他人一語之不偶。故宦遊半世而無聞。忽遭清明。如脫羈束。凡胸中之所欲。可悉達矣。雖天下之達官。殆不過焉。況復蒙汲引之公。無不盡推挽之力。必欲亟援于塵土。不知難近于雲霄。已獨任于揄揚。人備聞其委曲。勇于拔士。誰復如今。恭惟某官。以魏國忠孝之傳。負本朝公輔之望。每閱于郡國之小。未究素懷。所至以人物爲先。此其大略。有如猥質。尤費生成。竟出選曹。豈非僥倖。某敢不益懋舊學。以酬所知。舉者未嘗進謝于門。情雖不稱。大夫真能取人以義。報豈容私。強爲尺咫之書。莫殫萬一之意。

謝鄭尚書張京尹啓

三年子寧已絕榮望。兩譽溢美。忽加薦論。雖公朝方聽諸大夫之言。然露章乃得一不材之吏。不敢以獲于上而喜。大懼以辱。所知爲慙。伏念某心雖甚高。習已近下。自爲士已懷四海之慮。若不克施。繇從宦以

來半世于今。蔑有可紀。載忸怩而蹈俗。破崖岸以徇貧。欲申養親之私。遂干無事之祿。中更禍變。僅脫殞廢。顧退處則分宜。抑不祭之罪大。方揣輕重。而爲從違。希子公之力。而入帝城。初無一念之敢到。以當時之言。而推官屬。敢意十年而未忘。至數所長。尤浮于實。器何足以致遠。人已病其執方。事親不終。又焉得孝。律已無狀。彼烏能廉。學徒爲文。政不及物。是安可當執事之首薦。乃欲使與英俊而並游。或輓或推。固不遺于餘力。皆好皆惡。終取決于善人。果以過情之言。誤蒙召對之命。恩出于上。人推自公。恭惟某官。無官不宜其才。見善如出諸己。貴已分于喉舌。不知我榮。士必借以齒牙。蓋爲國計。致以譴薄。亦辱推揚。某欲爲誓言。非敢私謝。自顧小己。非長者而辱長者之知。惟竭一心。待國士則爲國士之報。

賀王狀元啓

狀元監丞。青箱嗣業。紫電淬鋒。出烏巷之諸郎。炳龍章之峻采。洞挾藝文之奧。起膺物色之求。旋升籍于太常。爰試言于便坐。百斤置石。首中于程文。千佛冠名。獨標于異等。被明綸而受職。貳雄闡以頒條。聊爲吉筮之權輿。曷測宦程之高大。夫何履尙。特秉謙勞。猥示華賤。過形盛飾。永言良愧。交切銘藏。

賀龔參政啓

光膺一札。入贊萬機。旣得我公。相與運廟堂之籌策。爭觀盛世。及是明國家之政刑。惠福生靈。安崇宗社。恭惟某官。行高而能鉅。形大而聲宏。惟仁義道德素蘊于中。故進退動止。皆有常處。九萬里斯展垂天之翼。尋常瀆豈容吞舟之魚。自結睿知。亟躋華貫。摧姦邪之萌蘖。能使朝廷之不輕。推學術之緒餘。皆信儒

者之有用。當江湖之歎甚。起凋瘵而肉之。還定流民。皆令如安堵之故。具宜德意。不徒爲掛壁之文。人當斯時。知啓遠業。果有鋒車之召。遂登法從之班。日對龍光。居尙書喉舌之地。竟膺圖任。爲天子心膂之臣。士氣自此少伸。公論于是復出。拔援善類。過于食而吐哺之勤。慰藉人心。若夫渴者爲飲之易。然竊觀今日之事勢。或似良醫之設施。當疾病將去之時。而氣血未充之際。用人如用藥。豈以旣效而弗圖。畏惡如畏風。定知自衛之益密。盡出平生之韜養。以爲不世之功名。某自恨凡庸。莫償知遇。敢作雷同之賀。有負門牆。輒申管見之私。以附干瀆。其爲僭率。未易貸原。

賀周樞密啓

恩隆麻命。班首樞廷。富貴非公所安。寧以是喜。功名爲國乃有。要不可辭。一身尊榮。四海安帖。恭惟某官。德溫醇而有本。行縝密而無瑕。文如玄酒。明水之真。正氣具足。人似光風。霽月之潔。塵意俱亡。惟平素結知于上者深。故晉用不以非道而屈。若禁廬夜半之數語。乃當世朝陽之一鳴。小人知朝廷之不輕。公道至今日而未泯。致身明白。肯以利回。因時卷舒。乃爲君起。擅四禁絲綸之地。嗣三王盤詰之風。學未宏施。士猶共惜。論道經邦于廟堂之暇。不忍詭隨于人。折衝禦侮于階楹之間。自能表立于世。夫以儒者而經武。斯見聖主之慮危。權一歸公。論僉允協。然而位尊顯則責望備。時暇豫則憂防深。兵多冗食。故生民之力傷。將不公選。故鬪士之氣沮。至若外敵之難制。豈如內侮之可虞。羣獠當鹽法之變更。狙伺嶺表。諸蠻持馬市之上下。虺撼坤維。奸民或據山海而披猖。驕卒近在畿甸而凌驚。天下之脈。概可見矣。君子之心。

寧不瞿然。勝固藏于亡形。豈容竊料。人不知而視影。安得無疑。某少以戇愚。誤辱提誘。忍懷不盡之意。貽爲入賀之言。蓋不學劍而學書。如古有奸雄之可慮。儻不以規而以頌。是今爲軟靡以相期。豈惟失疇昔依人之心。仰恐非賢者樂善之意。仰犯崇重。不勝凌兢。

賀劉樞密啓

擢自坤垠。入毗樞極。自州牧而與政。致中興不過數人。以儒者而掌兵。在今日誠爲遠慮。國有與立。世無所憂。恭惟某官。誠實無他。端靜不撓。自爲士已任天下之憂樂。其致君不爲世俗而從違。未嘗以家事辭王事之難。故不擇地而處。所至視官物如己物之惜。蓋本愛民而然。履行縝密而無瑕。聲名暴白而不愧。在朝廷則能令所居之官重。制藩閫則必動已去之民思。悶悶之政。若不快人。卓卓之功。每見于後。邈是巴蜀。當國西門。外有大敵虎視于藩籬。內有羣蠻狙伺于肘腋。況方饑饉之至。而有根本之虞。公適過征。人解憂色。不爲乖崖驚異之政。百姓信之則同。皆謂文翁廉平之聲。近世繼之者此。趣歸右府。允穆僉言。仰惟治朝立國之規。實在樞筦制兵之地。兵之進退。雖屬之將。將之廢置。則歸之朝。儻如身使臂而莫不制從。其誰敢侮。其或脛如腰而不可信屈。安得勿憂。欲反泰阿之持。喜觀成器而動。師出以律。乃在于國家明政刑之時。賢用則安。豈復憂廟堂有甲兵之問。某舊遊牆仞。久鬱巖瞻。式逢君子之登庸。竊爲蒼生而贊喜。凡所謂斯世之利病。繼自今以次而罷行。不得卽賀而以書。深慙無益。復敢出意而論事。姑謝所知。

除贛州謝丞相啓

恩隆起廢。遽叨分竹之榮。分薄擬災。已被負薪之疾。未免瀆陳其弗任。奈緣法守之難踰。徒抱素心。莫回成命。竊惟汲黯不省復收之意。乃稱病于淮陽。望之妄懷不合之疑。遂移疾于馮翊。雖強拾古人之遺意。然終非臣子之至情。所以史氏未免有偏心之譏。而後世亦薄其左遷而動。此豈君臣之交泰。致令誠僞之相蒙。聞事不實。而實事不聞。信者或疑。而疑者或信。雖習俗之固爾。豈爲士而不然。伏念某壯不如人。老而益耄。少日早摠于霜露。終身從事于刀圭。故其羸劣之軀。不勝勤勞之責。昨少疲于奔走。氣已亂于降升。曲荷皇明。屢賜休沐。逮出守荊州之地。愈不堪雲中之寒。尙稽報政之期。已有乞身之請。惟君父諒其素守。不敢肆欺。以祠官祿其餘生。毋俟再請。十年退處。百疾交攻。方沈疴爲孽之深。忽寵渥自天而下。欲悉陳狗馬之狀。乃薦申螻蟻之情。以避免之章。難至于再三。故懇祈之意。莫伸其萬一。尙蒙委曲。獲脫譴訶。茲蓋伏遇某官。獨秉國成。密參天緯。凡有生之疾苦。蔑有不知。寧敢暑而繭裘。乃可以罔。但欲廣搜羅之意。無復推姑息之仁。雖在罷癯。亦欲任使。某敢不勉旃。醫藥勵此身心。儻日月之尙寬。容其養病。或筋骸之復舊。焉敢忘君。

代袁守賀刑部周郎中啓

拜命紫宸。爲郎禁省。刑章滋甚。或者疑風俗之益儉。君子憂深。謂當自本源而置力。安可徒徇其末。而以求勝夫民。然在上者惟恃國之法而不任人。在下者惟軋人之情而合諸法。凡具獄而上者。多傳文以成。

之儻于吏牘而無疑。雖有枉情而莫辨。故聖人不以聽訟爲知本。而賢者猶以得情爲可矜。恭惟某官。智每用而益精。材遇事而立見。爲邦伯而伸萬物之氣。情僞具知。佐廷尉而持天下之平。輕重悉得。顧憲部久虛于郎署。宜聖皇首屈于仁賢。雖非超躐之除。蓋有深遠之意。歲斷獄僅于四百。昔人乃歸之養民之君。律爲條至于萬餘。當時不能止犯法之俗。惟公可以論此。斯人固有望焉。某濫守專城。竊庇廈屋。忽聞成命。倍切懽情。

止堂集卷十五

牋

壽聖隆慈備福光祐太皇太后上尊號賀牋

盛德難名。徽稱載上。璽書播告。海宇歡欣。恭惟太皇太后殿下。配地無疆。後天罔墜。三朝揖遜。定于半語之間。萬世功名。蔑有一毫之德。宜修鉅典。用侈鴻休。臣阻趁追班。無由稱頌。臣無任

壽成惠慈皇太后上尊號賀牋

至德難名。海涵春育。徽稱播告。雷動風行。於昭子道之成。有赫孫謀之善。恭惟皇太后殿下。德全坤順。位配乾元。雖以經營無外之功。不忘儆戒無虞之世。三朝揖遜。密贊睿謀。一人元良。動稟慈訓。以天下尊親之至。未愜宸衷。率百官若帝之初。載隆曠典。一傳顯號。大慰輿情。

壽仁太上皇后上尊號賀牋

載搜曠典。宙奉慈闈。五日一朝。安受大明之養。十行細劄。同歸太上之尊。於赫徽稱。有光昭代。恭惟太皇太后殿下。位配皇極。道參坤元。視太姒之嗣太任。于今爲盛。繇長樂而朝長信。自古所難。仰惟聖子拳拳之心。欲慰天下睽睽之目。誕揚顯號。庸盡新猷。

三宮加上尊號賀皇后牋

太上立德。早定孫謀。天子尊親。式昭婦順。徽稱播告。寰海歡呼。恭惟皇后殿下。與日竝明。如坤至靜。退安象服。上媲太姒之嗣任。入問龍樓。遠紹英皇之佐舜。典冊雖由外舉。愛敬實自內修。禮行有期。慶流無盡。臣叨塵法從。冗食祠官。扶杖隨癯老之民。喜聞明詔。奉觴如家人之禮。遐想盛儀。

光宗皇帝加上尊號禮成賀太皇太后牋

丕藏明禋。對揚前烈。大稱載舉。四字具宜。竊以堯無能名。莫言其盛。文所以聖。蓋有自來。恭惟太皇太后殿下。太極媲尊。坤元叶順。鳳輦昔朝于長樂。稔聞母訓之言。鴻名今薦于顧成。益見孫謀之善。臣欣傳曠典。屬守閒祠。徒深鼇抃之情。莫造鳧趨之列。

光宗皇帝加上尊號禮成賀皇太后牋

謁展圖丘。禮崇清廟。竊以舜帝主祭而享。始于媯汭之嬪虞。文王在廟亦臨。實以徽音之嗣姒。故推本其業業之孝。必求端于醴醴之宮。恭惟皇太后殿下。尊配乾元。厚侔坤載。承天之序。豈獨蘋蘩蕝藻之告神。奉先之思。宜及神聖武文之廣德。大稱外藏。美化內流。臣適奉閒祠。莫趨行闕。側聽鴻名之舉。徒增鼇抃之歡。

代京尹冬至賀皇太子牋

日行北陸。忽驚一氣之回。位正東儲。早應少陽之長。邦家茲始。社稷同休。恭惟皇太子殿下。貴貳一人。道兼三善。進而問寢。相欣愛日之長。退則憂民。必有書雲之喜。承天之意。與時偕行。某適以疎庸。誤司浩穰。

竊聽黃鐘之律。頓覺聲和。遙瞻碧鏤之宮。莫展趨賀。

頌

張京尹中和堂頌十首

中和有堂。其堂穆深。花竹陰陰。戶闔沈沈。堂中之人。玉立恂恂。昔有斯堂。今有斯人。中和有堂。內蔽外整。湖後若駐。江前如騁。靜不忘應。動不忘信。昔見之堂。今見之政。茫然太虛。升降盪摩。鍾粹于人。不偏不頗。存之爲中。其發也和。有欲不存。發將如何。實是天衷。實維賢哲。敬以持養。義以區別。以導斯民。如衣之揭。視聽言動。春風芽茁。其視惟何。胸中瞭然。舉是以鑑。吾無醜妍。彼姣而悖。此惡而蠲。匪視之流。所全者天。其聽惟何。不淫乎正。寧茹子逆。弗溺彼順。多言不工。法語自聖。匪聞之聞。實養于聽。言出如城。動安如山。非言之愛。出不復還。非動之難。輕則不安。循爾發見。求其本原。夜氣未離。何物不官。惟今之俗。鄙薄險艱。惟今之政。瑣細猥繁。以政正俗。如激上湍。安得從公。一堂葺永。弗棘弗墮。弗靡弗競。有庸彼勢。有罰彼咎。我心如何。雲飛川泳。水毀于東。火暎于西。天地中和。云胡亦虧。變之調之。有君有師。入佐天子。視公如箕。

銘銘。附。

寡欲銘

人誰無欲。多欲卽昏。天一之水。雜之則渾。寡欲有道。爲善最樂。此長彼消。乃壽之藥。

爲敖國輔書南軒虛舟銘跋

心本虛理。則實酬事物。無轍跡。來不迎。去不留。彼萬變。我日休。行斯道。險可濟。孚豚魚。貫天地。曷臻茲。在克己。去其窒。斯虛矣。

彭某爲國輔書是銘。或者問曰。此非南軒先生爲詹公體仁作乎。然先生旣以虛舟名公之齋。一日公謂先生曰。漆園之說。遜而離。吾無取焉爾。在易之中孚。利涉大川。乘木舟。虛也。吾將于是焉體之。先生歎公之善思也。故屬之銘。然則國輔安得有此曰。是理與都會相若。凡有足者皆造焉。而子猶介介然若有藩籬之間。殆非虛舟中人也。并跋。

箴

訓鉅箴并序

甲子春。鉅子主道之寧遠簿。將之官。趨庭請益焉。書十箴以警之。

官到任子。荷國寵恩。子不勝官。爲負其親。匪負其親。乃負其君。汝欲不負。當語汝云。右引。人謂能廉。乃行之細。細行不矜。終爲德累。賜不受命。豐約必計。竟墮貨殖。萬牛莫掣。右廉。胸中泰然。大可容天。偏偏仄仄。一室如狴。居寬有道。以人治人。毋忿于頑。孰非吾仁。右寬。用心而公。酸鹹同功。以私間之。肺肝華戎。汝觀平衡。金羽折衷。低昂非我。何適不中。右公。

萬斛之舟繫于一釘。元氣不完。百脈皆病。易有吉凶。惟以貞勝。萬邪莫干。孰不聽令。右正。民國之本。仁人之根。其根不立。他何足言。不忍于人。斯仁之端。不忍于己。人斯寡恩。右仁。人貴乎明。不貴乎察。汝職勾稽。細大必達。毋遺泰山。瑣瑣毫末。所得幾何。卒陷深刻。右明。民生在勤。弗勤則匱。自匱其身。猶事之細。仕而不勤。人必受敵。勿謂簿書徒勞。人意。右勤。臨事貴敏。匪緩匪急。緩則失幾。急則傷物。惟能明理。動則不括。何以能明。惟學之力。右敏。學優則仕。不學如瞽。奚止面牆。將亂璞鼠。惟學有益。豈云小補。汝儻知學。吾言皆助。右學。

初筮箴示欽之官莆中

吾仕于國。無一世勤。乃于爾身。受一世恩。是恩欲報。非忠不可。儻忠于君。即孝于我。吾語爾。忠心不可欺。勿爲利忱。畏害而違。趨利避害。撫心而背。是爲不忠。殞身莫悔。吾爲此箴。當爾弦韋。出如以隨。入如以歸。處事以公。所謂處事以公者。且以爾所職言之。納鹽人惟欲其少。受鹽人惟欲其多。少納以優。亭戶可也。亭戶辛苦。豈可多取。偏于一處。皆是不公。以至聽訟接物。每如此。須是參彼己去。偏黨無一毫私方。舉職以勤。御史以正。撫民以仁。謹以事大。和以接人。所謂和以接人者。非姘娶。隨變狎便。後如謂之公。舉職以勤。御史以正。撫民以仁。謹以事大。和以接人。小人爲也。遇事勿先發。以掩人之長。有善勿自街。以形人之短。才在吾上者。盡敬以親之。位在吾下者。自下以接之。惟儉與廉。治家及身。所謂治家。是事同以亂是非。勿私昵。以植朋黨。若識中庸。所謂和而不流。義斯得矣。惟儉與廉。治家及身。所謂治家。實客不可學。人豐腴。只要至誠。每每若自安于儉。儉外慕。不須好巧。食只要充飢。不須精細。如管待。汝往欽哉。以復爾名。

冠辭

冠鉉辭并序

古者重冠。故儀禮以冠爲首。後世冠禮寢輕。先正蔡公端明冠其子。僅能書祝禮等辭。畀之慶元己未三朝之始。吉日癸巳。加鉉元服。既昭告建廟。且踵蔡公故轍。詔以儀禮禮記辭義。庶存古也。既禮而字之曰節。

曰鉉。汝來其聽我辭。鼎曷用鉉。鉉胡玉爲。大易有訓。義匪易知。鼎爲器重。惟鉉舉之。鼎既舉矣。七載畢持。委鉉于鼎。若無所爲。以鼎用舍。匪我斂施。爲鉉以玉。其德實宜。其德惟何。廉而不劓。萬物芸芸。所賦不齊。太剛則折。柔亦不支。不中其節。均與用違。美哉玉鉉。無偏無陂。謂汝剛耶。始勤終墮。謂汝柔耶。抗志不卑。或佩爾弦。或易以韋。不中爾性。故以鉉規。字之曰節。汝其審思。

冠漸辭并序

姪孫漸冠。爲辭以祝之。長至日止堂辭。

一陽來復。加爾元服。如陽之初。初罔不穀。顧爾角丱。倏焉已冠。棄爾幼志。視爾之先。右初加再加皮弁。益緝其儀。凡厥庶民。孰不冠而進。汝于士。詩書禮樂。永膺爾福。右再加于焉三加。爵弁峨峨。天爵既修。人爵靡他。敬爾威儀。謹爾言語。永終厥德。受天之祐。右三加名汝以漸。字之曰巽。厥義維何。易有明訓。干尋之木。長于膚寸。溝澮暴盈。其落亦迅。躁言數窮。仁者則訥。疾趨而蹶。不逮相償。躡等之學。雖敏弗遜。巽以入之。千里發軔。右字

祭神文

宜春縣尉謁社稷文

惟民天生之。社稷食之。君命吏臨之。惟神鑒之。尉亦吏也。于民事敢不盡心。今以視事之初。具清酒庶肴。奠于壇壝。非以自獻而已。亦曰社稷食民之神。當爲民敬。

謁仰山行廟文

某以天子之命。來尉于此。凡名山大川。國所常祀者。皆當祇謁焉。惟仰山之神。能時雨暘。以奠此邦。某以官守。未能卽山之麓。薦禮展誠。輒于邦人嚴事之所。以奠肴酒。非敢不敬。惟神鑒之。

安福縣祈雨文

天監不遠。一念卽通。人欲未從。煩言成黷。致民之請。知罪莫逃。伏念某等。竊祿成貪。莅官無狀。諸吏暴橫。而不知禁止。百姓饑饉。而無以拯援。仰干至和。乃召仍歉。屬天時之偶順。幸穡事之將登。一雨愆期。四郊缺望。雖禱祈之既久。然昭格之尙遲。謝罪無門。籲天有路。爰致靈湫之餘澤。敬開眞字之玄科。自三日以往。爲霖儼蒙賜賚。無一夫不被其澤。皆得承庥。

安福縣祭疫癘神文

某惟此邑。春夏之交。疫疾大作。間有家死數人。疾猶未艾。嘗攷其俗。皆因不服藥所致。徐詰其所以。則云神實禁之。夫天地鍾至和而爲人。其飢而食。寒而衣。疾病而藥。無一不取足于天地。天地予人之藥。以衛

其生而謂神禁人之服而致之死。有是理乎。此皆由巫覡之徒欲假是以神其利己之術。而俗醫用藥多不得其當。往往不能起疾。則舉而歸之神。以逃其殺人之名。而謂神實然。非某所敢知也。俗惑既深。單詞難釋。今命醫者行視諸坊之病。而官給藥以治。率舉神辭焉。用是不敢不告。惟神血食此地。亦猶某等祿食此邑。其念斯人之心。必無幽明之間也。惟神相之。

安福縣祈雨文

丞攝令日

惟是邑頻年旱暵。民物彫瘵。邑吏困于奉上之不給。無力拯民。道殣相望。徒增蠹傷。今年雨暘時若。稻秀如稔。數日不雨。人情恐然。此皆吏無德所感。非民之罪。惟神社稷云實相稼穡云實相稼穡諸廟云血食此土。必不以吏之故移裁于下。敢用昭告。儻霈然之澤。不日同浹。使民有千倉萬箱之望。實惟神休。神雖不責報于吏。吏亦安敢不敬。

袁州權郡謁社稷文

社稷有功于民。民百世祀之。吏無德于民。民不能一日安之。郡祀社稷。非以報也。亦以勸也。某敢不敬。

祭仰山神文

邦人事神。其始莫窮。神亦惠人。莫知其終。吏之去來。何啻傳舍。而況于某。暫攝民社。視神于人。孰昵孰疎。儻拂于民。神豈庇予。酌此尊酒。非以祈福。誓安斯人。敢介于祝。

江陵府謁社稷文

某得鎮古荆。祇見社稷。敬共農事。惟守之職。不違農時。穀不勝食。儻戾斯訓。神罰勿逸。

謁東嶽廟文

惟神受職岱宗。廟食于荆。雖非其地之山川。守所得祠者。然神之庇民。民之敬神。無遠邇一也。敢以民情。涓滌告至。

江陵府謝晴文

天作霖雨。害我滯穗。吏實不德。召此大沴。奔告于神。神不我棄。氣鬱忽明。欲雨輒霽。豈吏足矜。惟民之瘁。神寶念此。卒掃陰翳。俾民婦子。獲斂獲刈。千倉萬箱。訖此豐歲。敬拜神休。尙幾終惠。

祭旗纛文

六纛之祀。從軍祀也。神其佐吾軍。毋從妖孽。以譁吾衆。則神不愧吾祀。

祭文

祭鄭樞密文

惟公廉而不劌。和而不流。學得玉山之正傳。人如元祐而不浮。進不蘄于苟合。退不爆于好修。廟堂之上。侃侃如秋霜之厲。畎畝之間。溫溫如春風之柔。人方競爲虛名。公屹立而無儔。暨玉石之俱焚。獨表表而莫仇。人皆窺識度之不凡。而非苟異以自謀者也。前疑後丞。與同戚休。何翩翩兮來歸。竟去畫而莫留。知者以公爲無累于物。不知者徒以爲自拔于一藩。若公心之耿耿。竟長往而難諏。某辱公之知最深。間何闊兮星周。望莆海兮千里。欲一慟兮無由。意不足兮矢辭。永相望兮千秋。

祭孫逢吉侍郎文

嗚呼從之而止于斯。陰陽降升。參差不齊。厚則多滯。至清易漓。君獨不然。何施不宜。百未施一。而止于斯。金匱石室。補罅鳩遺。才適其官。川泳雲飛。青蒲一言。奸詭魄撕。是是非非。曾幾何時。如君閱世。瞥然電馳。其遭既難。既合卽睽。天胡然耶。美成者希。嗚呼從之而止于斯。余之交遊。落落無幾。或殞乎東。或殞乎西。情親志同。況君匪夷。凶計忽傳。涕泗交頤。雪霜貿貿。名木多萎。命也奈何。孰知我悲。嗚呼哀哉。

祭趙介之參議文

嗟嗟介之兮。委世如遺。去不復返兮。去將安之。茫茫宇宙兮。浩無津涯。顧塵世雖若可厭兮。彼汗漫亦難期。嗟嗟介之兮。云胡不歸。公朝而出兮。姹姹暮而入兮。怡怡心如春風兮。無物不宜。一日不見兮。人誰不思。人方思公兮。云胡不歸。梅的皪兮。何萎。橘纍纍兮。若觴。昔焉芽蘖兮。條已離離。往培植之不足兮。今已勝雨練而風披。君亦懷此兮。云胡不歸。嗚呼。余之與公兮。不啻埴簏。忽捨我以去兮。我誰與比。景豈不猶昔兮。人焉已非。觸景以望公之歸兮。云胡不歸。余豈不出兮。人誰我知。人奚不我顧兮。疇如公夷。九原不可作兮。若之何其。酌此酒以永訣兮。齋咨涕洟。

祭陳司法文

君家于閩兮。余楚之尾。聲不相聞兮。跡不相值。忽作遠遊兮。宦予之里。一握之笑兮。得之聲氣之類。余不期見君子生兮。亦豈期一見而卽逝。嗚呼。天下之變不齊兮。非九九所能周。傾蓋之樂兮。獨不可留。肝膽

楚越兮今白頭。余之與君兮。誰使之如聚散之鷗。君有母兮髮垂白。思君千里兮若咫尺。今猶倚門兮朝夕。君子兮方髫髻。聲琅琅其誦書兮。已無穉子之驕。老農既去兮。誰耘此苗。君有友兮余三人。送君之柩兮江之濱。月白兮風清。終今以往兮。爲君銷魂。

祭寺簿劉子澄文

嗚呼。我之從公。踰三十年。義曰師友。情實諸昆。濟所不及。言人所難。或滯而輓。成墮而掀。左提右挈。無往不然。既見而去。如隣而顛。思之不見。如溺需援。分則有親。好無此堅。聞公生瘍。眊膚斯刈。人謂斯疾。懼不可全。我有親喪。欲往莫前。朝夕聞公。書劄翩翩。以字勁弱。與詞簡繁。卜公進退。憂喜伏焉。期以終喪。問公螺川。理棹已穩。方解拘攣。一朝有友。自公所還。問公如何。口噤氣填。忽云已矣。握手涕漣。嗚呼。我公何去。我之速耶。終今有疑。孰與告耶。我有文矣。孰與暴耶。天非冥冥。孰可復耶。樹善如斯。孰傾覆耶。有志未竟。孰與續耶。嗚呼已矣。尙忍詞而哭之耶。

祭寺丞呂子約文

嗚呼子約。何止于此。與君相望。曾不百里。書財幾日。不交于軌。日有駛卒。忽至自米。謂君溘然。神爲之褫。謂不然耶。匪惡曷毀。謂其然耶。天胡云爾。孰半不燬。孰燬不蕝。始疑而悲。復遣以理。有友書來。爲言所以。天不可謐。亡此友矣。嗚呼子約。而止于此。氣聚必散。人孰無死。而我何悲。于君之逝。君之胸中。如水無滓。而我何歎。寡弱子魂。無不之曷。此曷彼。而我何憾。蕭蕭野寺。天道流行。終必有始。君而不壽。我獨何俟。

有腍莫羞。有酒莫釃。哀恫鬱結。徒有此紙。

祭戚教授文

嗚呼伯瑞。止于此耶。一氣聚散。抑其理耶。散不足憂。聚何喜耶。而我拳拳。悼君死耶。抑有所感。不自已耶。交遊固多。孰君比耶。靜而不浮。山之歸耶。動而有勇。川之逝耶。稟氣之全。如此幾耶。命之不长。其誰使耶。嗚呼已矣。吾誰啓耶。莫寄此真。惟此紙耶。嗚呼哀哉。伏惟尙饗。

祭趙漢卿將領文

嗚呼漢卿。如矩絜兮。天分介特。若有截兮。飭身謹嚴。動有節兮。凜不可干。如冰雪兮。所積既豐。謂當艾耄。分耆年彊半。遽殞絕兮。卜宅之原。祖兆之側兮。雙劍同藏。其終閉兮。蒞萌看熟。饋饕餮兮。酌此尊酒。以作永訣兮。自今團樂。不見此圭潔兮。

祭孟浩文

嗚呼。余與養直。分則朋友。情均弟昆。往官宜陽。有盜略境。將師遠屯。王事鞅掌。母不得將。闕焉清溫。養直聞之。入告其母。踉蹌及門。迎置其家。堂萱之旁。十數朝昏。安余于疆。戮力王家。于屏于藩。余母既亡。臨弔其孤。嗚咽聲吞。切切惻惻。渠渠愛憐。瑣細不論。逮及同朝。官雖不同。同一心源。有善相告。止屬其居。出侍其軒。君去復來。我不能同。君無後言。及余去國。曾不期年。亦朱左轡。譬諸木實。氣至卽殞。遲速奚論。握節捫參。聲容沄沄。溢出於坤。余方屏居。喜君之風。灑此絀絀。別無幾時。計書墜前。神驚欲擗。雙劍于飛。間不

兩旬。噫其尤冤。君其悼亡。凡喪百須。藉君猶存。君既溘然。雙女惻惻。誰鬻誰飫。其誰奉君。而夷于堂。而沐于瀦。天耶人耶。以至此極。不可推原。昔與君別。于此江干。猶幾其反。及其反也。望天之涯。招君之魂。人生幾何。遽隔死生。如手覆翻。往不可追。來不可期。有淚潺湲。嗚呼哀哉。

祭十二姪縣丞文

嗚呼。惟予與汝兮。序同父子。惟汝視予兮。休戚一體。如手之運兮。如足之履。信詘進退兮。惟余心之使。余行千里兮。汝徒以侍。余疾且死兮。汝嘯以續。其將絕之氣。余欲善其族兮。汝耘汝耔。余欲遏其惡兮。汝屹然。猶中流之砥。汝之生兮。余猶有恃。汝既死兮。余其已矣。豈惟余失左右之助兮。抑家之否。柳之風兮。淒其。梧戴月兮。天聲耿耿。于余懷兮。惟汝知之。汝不見兮。我心傷悲。余疑兮。誰決。余有得兮。孰識。經畬一壘兮。淚盈臆。視影空堂兮。汝竟付萬里于不說。衫疎疎兮。煙浮。陟復降兮。一丘。千秋萬歲兮。汝惟此遊。今日汝往兮。余不能令汝之留。異日及泉兮。又安知無山川之阻脩。旂揚揚兮。去只。魂杳杳兮。山之趾。囊肉爲餅兮。判肺以齊。饗人所尸兮。汝平日之所旨。嗟余之姑息汝兮。不能如屈建之循禮。猶庶幾汝一來兮。寧謂余爲不知。嗚呼哀哉。

止堂集卷十六

四言詩

廣壽

人孰爲壽。壽莫如德。日新又新。終古不息。學以明之。先正我心。所欲旣寡。山崇海深。

許國公生辰有序

某幸分教公府。茲承鈞座垂弧令旦。無以自薦其區區。輒以恭儉惟德之義。衍之爲詩四章。章八句。併以其字爲韻次序。辭雖不足。意則有餘矣。伏乞采覽。

入事其親。愉色融融。出事其君。惟命之從。威儀抑抑。曷不肅雍。有而弗恃。是之謂恭。天下之惡。不如一僭。天下之善。不如一儉。物有不足。于我何欠。人欲無窮。儉乃防檢。人不自泰。以居故移。人不自奢。由養所爲。勝之有道。惟書與詩。願言君子。載思載惟。恭自內出。儉非外飾。恭儉而實。是之謂德。作德日休。心廣體逸。何以曰壽。由是而積。

鶯鳴十章寄戚伯瑞

有鳴其禽。其鳴維何。有懷其人。我心靡他。禽其鳴矣。惟其醜矣。我之懷矣。惟其友矣。

惟動有幾。萬變形之。視聽與言。難遏者私。
孰愛于母。惟善其善。孰友于兄弟。我獨終鮮。
有水涓涓。石鑿鑿兮。日滿月濯。成此圓潔兮。
有澤其涸。有山其落。有木而桷。則以其斲。
靜觀物理。式感我思。有風淒兮。吹我裳衣。
春花粲兮。兩山之間。誰與我適。觴咏以還。
日升于東。月生于西。惟神之馳。曾莫知所之。
莫克匪己。莫玩匪理。有懷于是。不知子之所止。

胡廣文以直養名堂。余舉伊川之說問之。往反數十言。終未判也。再以是訊焉。

以物養物。如水沃木。進彼有餘。益此不足。惟直與氣。如木有根。本既充盛。枝葉自繁。氣言其形。直言其理。
與生俱生。無彼無此。云何謂直。養此氣耶。直果外來。氣內出耶。孟氏此言。我知其自。則以告子。以義爲外。
謂直養氣。其差則同。疑其不然。願啓我蒙。

五言古詩

九日分韻得去字甲申。

昔從招提遊。岸柳擘新絮。那知再到時。葉落滿庭署。爭如青青松。寒暑了不與。古榦屈龍蛇。依然舊遊處。

觸物轉多愁。何以消百慮。陶潛早解此。撒手賦歸去。紛紛世俗流。何用苦權飫。試問皎然師。茶香得誰助。

別趙運使二首

丁酉冬

君子豈無欲。有欲未足憂。百計護此短。此心尙可求。向來畏人言。言者不肯休。不畏固未可。無言我誰尤。事當究本源。瑣細不足籌。有疾不忌醫。膏肓尙能瘳。

用民如用馬。可御不可馳。論人如論醫。貴常不貴奇。古來才智士。日與功名期。儻逢李廣侯。文帝數乃奇。先生磐石宗。一節江南歸。聖皇夜半席。寧以鬼神移。遙和清問下。萬里寄一辭。當使殼棘牛。不獨見乃知。

送廬陵李宰養直之官兼呈劉寺簿四首

戊戌夏

理財非鑿空。簡訟在謹始。林繁去冗根。卮漏無溢水。此理客可觀。妙處要深體。豈惟宰一邑。天下亦如此。原闕

履白貴賤。痛癢一體隨。萬事有定理。應之當坦夷。儻以我好惡。定非真是非。光風霽月中。寧許栽藩籬。富貴不可求。名節可不修。韓公三上書。所願略不酬。柳子百世文。莫洗一日羞。要須外無累。乃免罣獲憂。青青最高松。藤蘿所綢繆。繁陰豈足羨。試看風露秋。袁人思君侯。事事皆甘棠。君侯亦念之。疾苦如己傷。向來趣引輸。詔許仍舊章。抗疏論不足。古人所未嘗。此請久不下。公歸奏明光。渠儂未知公。尸祝無相忘。弦急無和聲。行疾多窘步。從容應萬變。乃有天下度。先生經綸才。所至祛百蠹。一州直易耳。治者弗敢措。

弱翁霽威嚴。猶被功名誤。孰知觀過仁。一蹴超聖處。
平生學不力。莫移資稟偏。疎愚寡周防。懸直細巧誦。
出身仕官府。何幸依仁賢。樸樸本無庸。刻畫幾成妍。
江湖政浩蕩。雲漢難攀緣。何以慰我思。一語當韋弦。

別宜春柯宰

秋風掠梧桐。歲月去如擲。功名趁彊健。君子有行役。
朝家政急賢。黼座不滿席。巍巍廟堂望。留客良獨惜。
誰爲君蘭言。亦有子公力。居然懷墨綬。懽喜動顏色。
宰邑世情難。指作富貴厄。公嘗爲我言。百里豈擯斥。
雖無槐鼎貴。均是代天職。人方事趣辦。聲譽已赫赫。
公獨安其常。容與不可迫。靜觀物議定。豈止較尋尺。
願公充此心。壽此一世脈。行行見天子。清閒下文石。
區區嘗試語。要不若親歷。公看江南貧。此豈州縣責。

和向倅韻

誤身利名場。無異一釜餽。置之水火間。謬以力取勝。
人生具天則。發見亦有證。如水行地中。投隙卽流迸。
但恐人欲縱。勃若一民橫。志帥儻自彊。萬慮當退聽。
誰能學禪伯。絕物以求定。吾聞至人言。當識動中靜。
萬變不可齊。一念終難正。口耳固在我。視聽復誰令。
須從事上學。寧有物外性。能用使太平。不用我何病。
斯言聞亦多。究竟終未瑩。從今三爇香。願以公爲鏡。

再和

今日若馭風。翺日如負甌。乘興試一出。意到卽爲勝。
鄉林有高人。能識未病證。談鋒不可遏。勇若春筍迸。

美名戒多取。夫子無太橫。鍾期不世出。誰作山水聽。人生具物則。天命我當定。起居孰非真。寂滅豈是靜。毫釐不密察。天地失其正。聖學有終始。謨訓嚴于令。窮理以致知。持敬乃成性。倘從口耳學。莫救膏肓病。大本若不立。寧論語未瑩。塗澤欲自妍。何以逃水鏡。

別孫隱甫

君家金石臺。我家富壽岡。十駟苦不遠。半世成相望。我爲一貧驅。觸熱來帝鄉。塵垢面未頽。鬱結志不彊。下馬忽見君。喜劇幾欲狂。未語心已傾。旣坐形俱忘。醒我醉夢中。被我冰雪旁。主人知客深。對著夜雨牀。猶恐客意短。渠渠羅酒漿。蟹螯擘新肥。荔子含生香。晚歸候月影。早游趁湖光。都城六月中。公卿簿書忙。而我乃與君。專此風露涼。笑語雖雜亂。理到味自長。平生區區願。恰此一月償。遽然委我去。令人熱中腸。兒女惜別離。丈夫重行藏。敢因杯酒行。感慨徒悲傷。君去起我思。綵衣拜重陽。願言各努力。白髮行中堂。

送劉寺簿知衡州

刺史官已尊。郴左郡尤古。太常墨莊家。帝命分竹五。扶搖負勁翮。巨浸落雙櫓。誰能極所至。千里看舉武。紛紛輻兩朱。局局印一組。世無元道州。萬物氣不吐。

藥翁吟

有翁憂思深。挾藥救一世。大聲疾其呼。負篋卽都市。凝視徹河漢。覘色見腸胃。巍峩一男子。面澤勝粉膩。翁前亟與語。腴理中邪沴。再三猶不聞。掉臂若欲避。塗人競擲榆。毋乃太逐利。那知此翁心。肝腦作布施。

厭見大官醫。十謁九不值。高車索禮貌。疑疾致金幣。侵尋疾已深。鍼達不可醫。卻推主人癡。嗜欲勝砭劑。天寒日以深。衰態日以至。稍覺念翁來。西風政憔悴。

送楊誠齋赴江東漕

愛公喜公去。愛國喜公住。公去不可留。一節江東路。停杯與公別。瑣瑣不足疏。金陵古都會。形勢天所付。江淮有前蔽。荆楚無後顧。矯首對山河。亦足發外懼。錢唐六十年。帖帖泰山措。繁華視舊都。無復郇瑕慮。郇瑕僅憂貧。雖貧猶未斂。安得小范老。前席借一箸。重畫汴洛謀。起此宴安痼。金粟互輸送。甲兵更守戍。去來倘習慣。緩急乃暇豫。耳聞不如見。公見況超悟。願公細平章。心期一言寤。從此日暮雲。不外錦囊句。

壽張京尹

紫巖天下志。勇決如百川。一身扶三綱。百醜妬獨妍。南軒經世學。仰嗣千聖傳。忽忽造膝陳。衆鳥驚虛弦。油幢入楚澤。不復夢細旂。公乘一節朝。遇合君適然。物弛久必張。後美開諸先。區區人力衰。今乃還其天。夷夏早知名。家國嗟獨賢。用大力有餘。入細心愈妍。三年尹王都。警柝清夜眠。忠言出荷橐。妙幹天機旋。反視班伯輩。但覺口語譚。要知源流異。孰似周公前。江湖秋已多。宇宙清無邊。氣凝萬類實。人亦體其全。況是嵩降辰。誰頌春容篇。願公如紫巖。而復得君專。願公如南軒。而享箕翼年。赤手洗甲兵。黑頭出貂蟬。卻從祝融峯。高處尋倥傯。

酒醒

世間顛倒事。一切自酒出。醒時清明心。醉後不可覓。醉時顛倒苗。或發醒時實。酒能醉人形。不能醉人心。心儻有主宰。萬變不可淫。大禹惡旨酒。拜善功最深。

題王仲顯梅谷

樓前梅十圍。負背花千樹。種花識花性。培養隨好惡。花無十日好。不憚千日慮。那知花已嬌。疲憊風能蠶。爭如歲寒操。盤結不擇土。時當氣栗烈。天地閉其戶。蓬蓬起南海。呼吸萬竅怒。向來桃李輩。縮氣不敢吐。惟有冰玉姿。秀發略不沮。靜觀萬物理。參差乃如許。不見千金子。宴坐危堂廡。一朝遇變故。倉猝失所措。不見陋巷士。脫齒甘梓茹。翛然天地閒。了不識憂懼。達人善觀物。在我乃不喻。須上最高樓。方能了真趣。

送李眉州

出捧毛義檄。不違菽水歡。歸侍潘安輿。能宣詔條寬。古來忠孝事。兼此良獨難。是心無中邊。寧擇陸與磐。區區平反念。雖喜不勝殘。那知容色溫。足使田里安。韋編三絕書。十載胸中蟠。用處義自精。何適非其端。如水行地中。渾渾不可殫。尙恨斗大州。不足觀其瀾。我昔欲見君。恨不生羽翰。及茲與君別。一飲盟已寒。人生聚散情。欲語徒辛酸。惟此一寸心。萬里聊相觀。

送張少卿知漢州用漢字韻

家傳張長公。張摯字長公。釋之之子也。坡詩云。膝上王文度。家傳張長公。直節可敬嘆。居官不取容。安有鄙夫患。奏劾司馬門。乃翁寧可犯。驚蹕當罰金。法令戒反汗。奈何盜環人。使遭滅族難。惟摯有父風。彼美淵明贊。由來陰德深。雲仍繼

名宦。西州清河家。簪紱誇里閭。我公翰墨英。蚤歲擢三館。立朝物望歸。駸駸歷華貫。蓴羹忽思歸。周邦喜良翰。三節歌皇華。風采肅廉按。召歸一再遷。卿月光有粲。廷尉天下平。異論乃冰炭。守道當守官。聞風志立懦。分符復西歸。顧憂寬宵旰。廣漢最繁麗。地望蜀郡冠。房湖天下稀。公餘可吟玩。十頃玻璃風。荷氣來隔岸。過家亦足榮。觸熱去不憚。三世居此官。盛事聞見罕。甘棠百年思。蔽芾陰更滿。少城我從公。轉首歲六換。人生一浮萍。誰料聚與散。荒涼更寂寞。一笑得承款。束之宰相材。自是一好漢。坡詩嘗用一好漢事。舊唐書載武后思得一好漢而用之。狄仁傑乃薦柬之。新唐書改一奇士。不惟失本意。而亦無味。大手當調羹。先試五花判。願言堅晚節。功倍事則半。衰病臥漳濱。尙念劉公幹。

慈順堂

我官廣文館。門巷正蕭索。王孫幸過我。開口有請託。索詩慈順堂。一再不可卻。人心有太平。此豈易描摸。天天吹棘心。韡韡燦棣萼。君方大歡足。天地費酬酢。而我獨零丁。詩復那可作。因君索詩苦。謾薦嘗試藥。中庸十五章。謂第十此理非外鑠。反身若不誠。爲善終未樂。

尙綱堂

人精畏所見。假善以自欺。不畏或未死。心僞誰能醫。風雷動淵默。日月行屏幃。念起物自形。矢決猶可追。而乃如琴張。堂堂亦何爲。君子非惡文。文勝質乃衰。試看堂前草。安得青如茲。

同陳祕監諸丈。送黃商伯守常州。石叔訪守上饒。會于艮山門張園。以人生五馬貴。莫受二毛侵。分

韻得貴字

惠山滋華池。玉山潤百卉。二賢競出守。山水亦自慰。人生別離難。朋舊走相謂。剋期會南湖。肯託簡書畏。敬酌萬石君。欲歎不敢懷。願如玉山高。物物飽生氣。又酌雙井公。一舉大白旣。願如惠山清。滴滴濯肺腑。擇侯須擇賢。無乃拔其彙。帝城人欲入。競進去乃貴。誰無螻蟻心。早去亦有味。朝家急賢秋。人物欠經緯。想當分符時。欲遣意猶未。幸無疾其驅。有詔儻可暨。

送呂子約赴天台倅

少讀麗澤書。投老未盡識。譬如涉大海。渺不見其極。去之若有失。從之了無得。約兄自西來。爲我倒胸臆。始知公輪巧。要不外繩墨。從茲往來頻。不辨主與客。去住寧有定。長恐使南北。誰題治中輿。別日忽相偈。欲留留不可。把袂三歎息。送君浙河西。狂濤立如植。君其穩駕浪。我亦理行幅。斯意莽無窮。所願各努力。送何同叔赴湖南漕

疇昔登賢書。夫子持文衡。每見輒忽別。問端不能更。一從齒周行。後先佐司成。未幾奉辟書。復接臺中評。詞色陶春和。風味浥秋清。人生事好乖。歲晚意始傾。云何千里去。一節湘中行。留行我無說。脫去公方榮。人言轉輸重。我視錙銖輕。望之拾遺願。公豈少此情。向來否泰疏。上亦知忠誠。公身有內外。公意無虧盈。鴈來書可慰。細數新豐程。

送范文叔知彭州

吾友范文叔家世岷峨州。忠純自性分。耿耿明月秋。竭來聲利場。況與造物侔。汲引如不及。不進不肯休。酸鹹性難齊。委曲能調柔。一朝善類合。人亦多君謀。或者以己量。謂君相比周。在我亦何憾。太空雲自浮。俄然動歸興。誓去輕于鷗。始知進退間。君子得自由。聖主羅衆俊。巖穴窮冥搜。何以斗大州。著我第一流。無人子思側。殷勤爲王留。謬當豹尾間。對此誠包羞。五馬豈不貴。吾非爲君籌。君儻知我心。毋忘天下憂。

別周侍郎五首

東家十畝橘。治蠹苛于獄。課童事剝決。生意長不足。不如西家農。未麥土已熟。一朝種子落。坐見天地綠。人便適性事。醫乃逢其癢。有藥不投疾。但欲甘于飴。安知萬全方。非取頰舌宜。誰能味此苦。恐厭功效遲。太和到處萌。物各從所受。老農嘉穀心。自覺稊稗醜。道旁有荆棘。斤斧不得宥。移根著山阿。吾亦付薪槁。鵲有護巢心。鴉負奪巢力。紛爭互勝敗。卒乃覆其室。魯雞本非鵠。伏轂出羽翼。我無拒爾心。萬物同一息。創平痛方定。醉甚忽解醒。乃作翻然思。遽能免心驚。君子足遠慮。小人無隱情。有言儻可吐。守口何如瓶。

讀書吟示鉉

吾聞讀書人。惜氣勝惜金。纍纍如貫珠。其聲和且平。忽然低復昂。似絕反可聽。有時靜以默。想見紬繹深。心潛與理會。不覺詠歎淫。昨夕汝讀書。厲響驚四鄰。方其氣盛時。聲能亂狂霖。倏忽氣已竭。口亦遂絕吟。體疲神自昏。思慮那得清。安能更雋永。溫故而知新。永歌詩有味。三復意轉精。勉汝諷誦餘。且學思深湛。

士缶

士缶寡譏諄。白璧多瑕疵。毀譽未必公。名起謗亦隨。天下有眞是。不在愛惡時。青青荆棘場。拍拍蝴蝶飛。不如歲且寒。更試松柏姿。

臨江郡齋邀涼亭分韻得居字

子猷猶愛竹。愛竹意已疎。著腳踏危機。肉相元未除。要識竹情性。顧我求其初。是中儻虛明。處處我與居。公侯胸中竹。不受富貴鋤。平生對此君。意足不願餘。炎天憩斯亭。洒洒涼風儲。涼風不可招。招得還躊躇。悠然忽相會。我適還似渠。明朝有公事。此意當何如。

輓張南軒先生八首

妖氛動寥廓。白日漫沙塵。忠義不可沒。扶攜憫如邪。人情易勇怯。鼓舞吾當伸。忽忘天地讎。卻見玉帛鄰。淪胥五十年。銳氣日以堙。皇皇忠獻家。正議摩秋旻。隻手提三綱。一縷挽萬鈞。狂敵不足滅。頽俗何由仁。千載諸葛公。相望吾霑巾。世無鄭孟氏。聖道危于絲。學者迷統緒。擾擾徒外馳。況有釋老輩。竊窺如鬼魑。苦彼疑似說。陷我高明資。偉然周與程。振手而一麾。源流雖未遠。清濁亦已隨。公如一陽復。寒烈已可知。斯文續以傳。歲晚非公誰。傷哉後來者。此世亡此師。

邪正不兩立。何異蕕與薰。寧懷愛憎念。趣尙難同羣。向來閭閻疏。杯水沃烈焚。雖無撲滅期。固亦摧炎熏。黃鍾動孤管。衆樂知有君。祗今才數年。蒼蔚朝隣雲。公身雖已殞。公言猶可聞。所期動九天。從此涇渭分。

寧願如曲江一尊醉孤墳。

時平有賸賊人夥無寬鄉。上下日逼趣彫瘵誰得將。紛紛幾守宰。所較有短長。專利計錙銖。治法出一方。惟公作州牧。萬物驚初陽。仁心所發施。四達無門旁。丁庸省嚴瀨。鹽筴寬南荒。直惟此方人。歲時悲奉嘗。凡公不到處。今恨無甘棠。

吳楚尙譏鬼。習俗久已荒。淫祠張鬱氣。馳走如奔瀧。春秋嚴報祈。夜鼓紛逢逢。娛神雜羽翮。醺酒堆巵缸。間用次睢社。千金博奇處。公能揭正理。開此一世恣。寧關祠有無。廬屋記崆峒。要令冥行人。從茲得明釭。平生中興念。渴飲而飢食。落落不可合。令人氣填臆。歸來牧桂州。才人用轉窄。撫摩日多暇。整整戎事飭。偏伍聯浮游。坐作親部勒。異時了劇寇。乃此諸校力。論兵較利鈍。夫豈謂深識。牛刀何施宜。功乃在鷄肋。誰知我公心。披淚三歎息。

拱壁墮泥塗。康瓠置壇墀。天心與人事。頗似好乖舛。賢愚真是非。每向死生辨。哀榮若相迂。遺恨常不免。前年建安公。罹此二氣殄。今年公復死。殞我一世善。龍文百斛鼎。功在白玉鉉。斯人太薄命。長苦樂事鮮。時因思賢憂。終夕長展轉。

昔年清江上。再拜投漫刺。忽忽僅班荆。春風滿懷袂。自此成契闊。書郵剖疑義。此理有會通。萬轍而一致。縷縷爲我言。顛倒行間字。濯手時一觀。如烹大鼎馘。嘆我無持操。莫勵四方志。君子不再見。已負終身愧。從今一杯月。永墮湘中淚。

止堂集卷十七

七言古詩

登上封半山而霧大起歎而有作

憶昨雨霽投招提。五峯幻出如新沐。僧言一月無此奇。正直由公感通速。傾曦已沒暝靄生。竚立危亭看不足。遂扶晨策陵嶠嶽。要識祝融真面目。輕陰閣雨日將升。淺霧歎雲生半腹。晦明變化在俄頃。山鬼無端太翻覆。東西南北杳不知。天柱諸峯固難矚。因思世事無不然。氛垢時多少清淑。良辰一遇信可欣。濁世相遭匪予辱。湘纍爲此賦遠遊。要待棋終看結局。嗟我寧能待汝清。原隰征夫駕方趣。安得韓公劍倚天。決斷浮雲取新旭。

送趙使君老父吟

使君朝天騎霜蹄。朔風獵獵吹裳衣。鉦鐃聒天山谷應。旌旗弄日龍蛇飛。邦人遮留留不得。壯兒截鐙小兒泣。老翁數十相扶攜。喘若筒吹行轉疾。且行且止相嘆嗟。若怨若慕言紛拏。一翁指我門前土。向時榛莽今桑麻。自言新年年九十。舊使姓名多記憶。從頭屈指細平章。清淨安寧今第一。狡胥每欲挑民爭。能令衽席生五兵。我公平易與民近。智巧有盡難施行。里中年少號刀筆。曾向公庭覘消息。歸來語我使君明。胸中是非紙上律。吾農疾苦年來多。公今歸去誰撫摩。留公無計可奈何。呼兒起舞吾當歌。官家神聖似堯禹。螻蛄宮深有言路。借留誰格向來書。猶有民謠能取否。或聞朝廷虛柄臣。須公經濟難逡巡。延英

奏對刻易下。囊封且說江南貧。

送王仲顯赴瓊州

朔風獵獵搜離思。千山木葉飛東西。山聲互答轟鼓鼙。日影倒亂摩旌旗。瓊山太守行赤帷。父老出錢相扶攜。把袂惜別車去遲。仙都散吏挈榼隨。洗醪酌酒歌別離。別離之歌歌聲希。女子態不願爲聖皇擇。守先南陲。朱崖況復環生黎。黎山插天海四圍。黎人出沒如鬼魑。兇黥納集不受羈。無異生縛虎與熊。乃令錯處海一涯。一日萬變藏幾微。趙張縮手龔黃癡。良二千石非公誰。公行南方易如歸。公舉南事易如攜。向來鹽筴一局棋。白黑紛亂楊朱歧。公能辨析是與非。袖有長疏天下知。口不可惜人可悲。鬼魑虎熊日夜伺。此時此事分安危。想公再拜辭玉墀。容意懇惻亦在茲。九重寄公萬里師。紛紛獄訟不足治。從駟遽聽東南馳。定知召節封金泥。不然鹽筴更疇咨。服嶺以南公一夔。與公離別歌此詞。愧不以頌而以規。病足歌

馬有足。疲驅馳。牛有足。勞畬菑。不如大閭無更好。終日兀坐如黏鰻。人言猶有深意存。騰蛇無足終能飛。此心儻欲與日競。莫道有足無亦病。

送曾無瑕改常州

夫君愛民勝愛己。不愛公卿求刺史。得州如斗喜不禁。拍手催兒治行李。朝家急賢不惜官。日月中書有除旨。周南留滯太史歎。目斷子公書一紙。夫君卻不薄淮陽。此見寧輸三十里。庖丁雖欲善刀去。無奈世

間多巨擘。晉陵繁夥。視三輔。歷徧屏風。無可使。未央對罷。天一笑。今日無憂。惠山水。未容遠去。引自近。早晚賜環。差易耳。九華卻恐怨君王。誤我明年花柳喜。

次韻教授兄友惠柑

泮宮老潘賢。且仁分義濃。和手足親。懸知故人在千里。健步遠來。緘墨新。黃柑霜後愈精好。香味宛然包貢珍。分嘗且用滌煩渴。不救萊蕪炊甑塵。

送任守赴邕管

吾聞廣南東西四十州。諸蠻錯處如蚍蜉。東州之蠻富珠貝。西州有馬供羣驕。一從隴右失芻牧。萬里山蹊來作足。部分驛使視行廐。路遠疲農輸食粟。邊頭給估不敢慳。內地供億那得閒。匹馬中人五家產。歲入不足充軍頒。天子擇侯嚴五管。橫山之雄視方面。大賢不合著炎方。一馬直應勞遠算。往時此地驚智高。四海俶擾如抑搔。要荒易動古所畏。況復立制爭錐刀。年來馬質亂三物。廊廟謀深匹夫忽。達官喜事失拊循。機矢銛矛變倉猝。遠利安蠻福及人。公行公行南中春。一篇駟頌誰能寫。足用愛民功到馬。

五言律詩

別袁州司戶司馬行之二首

四海司馬氏。大州從事賢。剴裁無劇務。抑鬱已三年。人在甘棠裏。夢回春草邊。知音有當路。何日踐英躔。一見已草草。那堪更別離。事當防快意。學亦進潛思。此道今誰語。如公豈我私。何時一牕下。重與論心期。

送牛守赴藤州二首

五馬南中去。脩途一月寬。暮年憂國切。今日愛民難。志大人無小。政平人自安。端能掃蠻瘴。莫作偶然看。半世幾契闊。今年又別離。我應嗟去遠。人已恨來遲。宿草青無限。野花紅欲窺。藩車行有詔。山路且逶迤。送梁憲易節漕蜀二首

雨露收江上。星辰下益州。有賢容在外。爲國豈無謀。德旨頻將遠。君心頓減憂。不然那有此。定自啓金甌。峽口大江急。劔門天下奇。不因逢使節。安得入公詩。萬里輕來去。一心無險夷。可憐門下士。猶惜別離私。寄黃商伯兼簡詹元善

今日蠻荒好。逢人說桂林。祇應一片雪。端在兩公心。祈望羅明月。生黎斷水沈。滔滔逢所往。莫忘指南針。挽益陽縣丞趙參議

一種銀潢秀。清名仰太虛。甲科嘗擢第。午夜尙觀書。已覺身非我。那嗟丞負余。斯人無復見。掩涕一欷歔。挽熊仲賢監酒二首

歎息熊公子。胸中亦自奇。典衣緣客至。沽酒趁□□。眼皆知己。平生卻數奇。一官終未試。回首不堪思。舉世嗟浮薄。誰堪寄死生。空餘交友恨。不見急難情。我□爲遊子。公方作遠征。那知成永訣。酒淚閉佳城。挽楊邦寧

心事誰能識。交遊得細論。有居多水竹。此世老丘園。遺恨成千古。無人作九原。晚來風政惡。不忍賦招魂。

挽歐陽幼立

行輩多名宦。鄉閭愛老成。身名了無恨。韋布卻爲榮。久矣追談笑。居然隔死生。朔風搜宇宙。何日閉佳城。

挽朱彥博二首

重惜夫君去。哀吟思不窮。江淮經畫裏。風雨笑談中。志大長違俗。才高無近功。蓋棺公論出。誰不羨英雄。對語牕飛雪。橫舟月在灘。西湖今會少。里社此盟寒。諸子齒猶稚。慈堂寢未安。俱成無盡恨。一見一辛酸。

挽沈漕宜之父主管

蟬蛻軒裳早。冰融義理深。但知捐世累。誰復識公心。宇宙終埋玉。哀榮有賜金。遙憐九原上。煙雨暗寒林。

挽尤尙書二首

太史疾已革。君王意尙疑。欲爲宣室召。深動畫堂思。共起云亡歎。空嗟大用遲。九原如可作。願賦百身詩。天子青宮友。清時法從賢。典型諸老舊。人物中興前。鎖闥堆黃紙。金華疊細旂。奪公何太速。誰與問蒼天。

挽虞夫人

欲說夫人事。誰能與世論。諸郎名節立。千古婦言尊。共此傷心日。懷哉錫類恩。佳城何處是。煙雨政黃昏。

挽余丞相四首

憶昨隨南史。常窺侍常垣。負牆須密命。垂涕進忠言。懇懇精誠到。巍巍廟社尊。至今天下誦。功業在調元。慨惜三朝老。忠勤一代師。冕裳親奉日。鼎鼐手調時。揖遜承三節。安危繫一辭。世平今似水。卻歎哲人萎。

三絕今非少。元功人未知。豈云公有憾。時恐世傳疑。誰解吟成史。寧憂罪到詩。詩成終自愧。空恨一年遲。疇肯危疑日。嘗爲根本謀。不緣公一語。誰識我深憂。分關因重見。忘言只對愁。無窮千古意。有淚付東流。

代張京尹賀皇太子生辰三首

問寢隨天子。論經有帝孫。千年幾神聖。四世一乾坤。盛德從心遠。靈源自古存。欲知天意近。九月似春溫。神光開甲觀。寰海作重陽。世盡占人瑞。天應發子祥。山河涵玉露。象緯瀉銀潢。有道如三代。寧須不老方。青禁羅雞戟。朱明出虎闌。布宣當浩穰。簡樂著精微。有志窺成畫。無材守一圻。徒能歌聖子。重潤更重暉。

七言律詩

奉和御賜進士詩

昭回雲漢揭天章。忽到人間足寵光。必有鸞言興率作。不須顰筑歎飛揚。湛恩汪濊傾多士。密意綢繆際萬方。何幸小臣陪俊造。一如豐草在成康。

和袁州張守鹿鳴宴韻

太守興賢極選掄。奏書飛上帝王闕。幾年霧隱南山豹。今日風搏北海鯢。得士不孤天子詔。贈行仍有古人言。向來勸駕應無此。且喜成周禮樂存。

和臨江庚子鹿鳴宴詩韻

風流醞藉足儀型。小屈旌旗鎮列城。筆下雄深過班馬。胸中灑落似張程。載賡宵雅推多士。寧許皇耆繼

大聲聞說河南詩有序。從今亦有口傳名。

和李東老韻

胸中塵慮厭多多。彊把詩書細刮磨。幸有長官憐拜起。苦無公事礙吟哦。自漸俗駕爭相逐。不識高軒肯見過。天闊鴈寒人又遠。一盃相屬意如何。是日迎一兵鈴不知東老見過既歸乃迎見之可謂失所先後矣慚慚慚慚

和臨江丙午鹿鳴宴詩韻

暖日輕霜作小春。冥冥鴻鴈正來賓。異時大比興賢禮。今日元侯勸駕身。西漢循良知賈誼。菑川父老送平津。眼中俱是青雲客。著我空慚跡已陳。

挽無爲軍王守

再分符竹向淮濱。只得除書下帝閭。不見使車隨邸吏。忽傳鳴馬蹙都門。豐碑未盡平生恨。哀些誰招天末魂。木落山空風獵獵。不堪俛首奠黃昏。

挽傅德芳主簿

亭亭梁木遽然傾。吾里諸生失典型。已向東維次箕宿。定知南斗厭文星。書盈故篋墨猶溼。影掛虛堂燈自青。忍聽伊鳴哀挽罷。一川東去杳冥冥。

鄂渚和章同年元榮鄧教授友龍微字韻

愚魯何妨與俗違。夷途方始識心歸。源源自是淵泉出。果果寧關庭燎輝。章以道術見示因語以學須先理會大本章一言而契遂以詩

相遺。故云。莫向天涯尋墨客。須知海內有公非。謂子澄。一杯何得如前日。竹杖芒鞋語翠微。

再和

世情如水與天遠。誰識春從嶽麓歸。袞袞源流知有自。紛紛華鄂看相輝。今人得似古時少。我拙鄧號拙齊故云。從教俗子非。且倒一樽尋樂事。奇章臺上晚風微。

挽陳迪功

一念超然與世遠。新蔬翦雨自甘肥。只因墮鴈能忘味。不使驚鷗尙見機。有子明經那不壽。如公積善未應非。從教天定知何似。果見賢孫擢第歸。

慶元戊午。臨江勸駕多士。凡由進士科進者。皆預焉。且沿鄉人飲酒之意。敍坐以齒。酒半。使君又出傑句寵其行。某陳人也。偶觀盛事。思有以記之。敬嗣嚴韻二首。極愧不工。尙幾鐫削。

太守興賢隘九州。勸爲之駕盛炎劉。方今神聖四門闢。卽日英雄一網收。在藻久觀鱣發發。食苹又聽鹿呦呦。來年候對春風仗。企首同趨曉月浮。黨里情疎孰繼周。義年僅署竹冠劉。燕毛不見三王盛。古意驚從一日收。已許陳人觀易易。再賡宵雅詠呦呦。試將旅語從頭記。七字應無一字浮。

重九

露下風高足感傷。天君著意寫重陽。建安能賦推諸子。楚國悲秋又九章。我爲催租閣詩思。誰能送酒沃

愁腸黃花不解知人意。開遍離根數百行。

病中招孫醫士

瑟瑟纔動熱蒸蒸。直到更初漸漸清。臟腑始堅今反利。痰涎愈盛氣難平。形容凋瘦真如鬼。耳目聰明粗似人。自是虛勞無可說。更將經絡爲推明。

止堂集卷十八

五言絕句

邀涼亭五首并序

庚子夏知府史公薤荒植竹。因竹爲亭。氣象森爽。可以濯熱。乃以柳柳州詩。扁曰邀涼。一日攜客落之。倡以新詩。分韻屬賦。某旣着語。詠此風竹矣。自恨爲韻所閔。思不能暢。輒以樹竹邀涼。颺爲韻。再成五絕。上呈。然營度辛苦。竟亦不能奇也。辱琢削爲幸。

勁節不可拗。淨色不受污。平生今日交。屹屹老桂樹。
史君大雅資。胸中淡無欲。尤物能移人。猶有此數竹。
涼風不肯來。偃蹇如相要。悠悠天地間。捨我從誰邀。
未必柳柳州。有此一餉涼。心清境自靜。內躁物亦彊。
簿書本不俗。安能礙涼颺。少陵冰壑心。卻恨與事違。

上帥漕閔雨十首

天子治平切。一賢遠王畿。朝廷豈不重。赤子貧無依。
九雨當一晴。燥濕未應革。那知平疇間。已作龜兆坼。

一冤旱三年。此理乃無欺。乖和自相召。天意容何私。
文移急征輸。追逮及圭撮。安得語里胥。反手逐旱魃。
豪家低昂心。常對時虧盈。卓氏一窖粟。殺人眠長平。
白粲十萬艘。日夜隨東流。常平貫雖朽。還作蘇民不。
飢民日嗷嗷。洶洶潰堤水。痛決未可知。無易此一蟻。
羸然一老翁。一病一傷和。寒暑不可測。奈此根本何。
天時不可齊。天心不可違。君子能知天。手轉豐凶機。
德意徧巖谷。純心對雲天。辦此一爇香。從公作豐年。

送趙介之赴春陵十首

訪舊知俗非。好書與理近。氣味旣如此。況復少畦畛。
少年擢兩科。才氣揜公行。恨無東坡翁。爲君賦秋陽。
百里不足騁。千里漫同流。推君友于心。對此良優優。
君知作縣易。我知作縣難。臨深以思險。願勿作易觀。
賦拙君能傳。政拙君當繼。爲問春陵人。巧者竟誰似。
嘗聞居士語。丁寧有深旨。要使眼高人。不識貴公子。

忍酒非上策。忍醉乃真方。長憶醒時悔。須減醉時狂。
齟齬不足病。快意或爲妖。尤物亦移人。此念當永消。
二老不忍別。相期尙百年。正當愛日時。賸種北堂萱。
燭然亭上雨。鑑止池邊月。人隔九疑山。何以慰愁絕。

別徐商老奉祠歸清江五首并序

甲寅之冬。上命某守荊州。某以公在幕府。欲固辭。或曰。法不可也。旣辭不獲命。則僕僕而西。已而公與某書曰。已上祠請矣。慚不可忍。某到荊兩月。公祠命下。卽日揚舲而東。中懷慘然。敬賦五絕。以寫兄弟之情。恨不工也。目而斥之。爲幸已甚。

平生兄弟間。聚少散亦多。欲作對牀夢。奈此往復何。
法許公不許。法不如公嚴。公不爲我留。寧避世俗嫌。
我歸不能休。公去不可挽。依依原隰間。相對意無限。
嘗覩金匱書。遺逸窮冥搜。肯令太史氏。挽作周南留。
離離鴻鴈行。漠漠鱸蓴秋。誰獨無此情。何以寫我憂。

和王弱翁七首

不作畫梁燕。定非幽谷鶯。此心無著物。萬事莫留名。

貓頭爭立玉。黃雀膾披縣。橘子生猶綠。江南十月天。
漏恩餘草木。苛斂察箕頭。猶有形骸礙。誰爲根本憂。
濃淡雲山色。抑揚風水聲。體中有佳處。不是喜雙清。
曉日開屏障。監輿行畫圖。融融萬物表。此處是規模。
霜螯百鎰重。入世一身多。我意已淒慘。如君風味何。
地熟桑麻易。村深氣象醇。此行真不惡。今日似陽春。

燕居十六首

事以義爲本。尤須禮作輿。有時當致曲。切勿背吾初。
多貪緣縱欲。多欲必傷生。來日應難料。空留不善名。
酒盡或容求。恩傷不可收。偉哉王相國。沈默孰與侔。
荆棘不須栽。須容駟馬來。面前如路窄。何地不蒿萊。
迂轡不難爲。長愁與我違。忍貧勝忍辱。免被好人嗤。
好語噤難出。卑詞強應酬。只云逃口禍。卻恐遂成偷。
事事皆由命。窮通各有時。窮通吾順處。雖命亦何爲。
競索駕高車。吾寧守戶樞。安能念榮悴。且欲辨賢愚。

宿怨養癰疽。終須殞此軀。若能忘物我。天下盡平衢。
爲利較錙銖。眞成小丈夫。脂肥不滿腹。罪已塞堪輿。
七情隨物感。惟怒最難平。我若能忘物。如雷動太清。
我身何自有。毫髮自親來。身且非吾物。何論身外財。
好毀非佳士。毋輕聽彼言。如人名父母。急去不須聞。
物害須當去。無爲煦煦仁。可憐永某氏。愛鼠卻傷人。
冬月不啓壁。深慮驚蟄蟲。物方全性命。如我愛吾宮。
捧檄爲親喜。拖紳豈我榮。若謀妻與子。寧不愧何平。

七言絕句

和壽岡楊先生上丁四首并序

郡有學祀夫子。春秋釋奠。禮也。其品章存有司。然間有不舉者。郡將施侯至此邦。盡舉其遺。始製祭服。乾道己丑八月。上丁禮成。鄉先生楊教授作詩紀其事。以寄教授張丈。而未有紅裙之句。某不揆。輒嗣韻奉呈。且爲張丈解嘲。并以二詩頌先生詞翰之美云。

禮成縣絕固遐方。揭此威儀日月光。他日抗章論祀事。賢侯不減漢平當。

書牕兀兀到斜曛。羊胛烹來我亦欣。莫訝廣文官獨冷。水光一抹當羅裙。

未識平時活國方。只將詩句閱風光。盤空筆力今誰敵。獨埽千人不可當。
竹暗橫牕日已曛。我方酣寢學羊欣。銀鈎鐵畫應無限。乞取先生一練裙。
挽趙通判五首

弦歌到處卽熙然。桑柘青含淡淡煙。肯倩奇花樹民怨。爲人歲歲作春妍。
春風千里下屏星。荆棘叢中稻眼青。凋瘵已肥身已瘠。丹砂還解此公靈。
風波要自吾心定。涇渭從渠何日分。公已著身榮辱外。世間餘子自紛紛。
向來三疊泣陽關。猶望歸來肯自寬。今日重過更席處。卻思人世別離難。
霜風獵獵寒無奈。江木漫漫去莫留。欲訊音容無定在。松筠竦竦暮煙浮。
和徐思叔謝向大夫惠柑四首

萱草堂中樂洩融。豪家異味可能重。政慙陸子懷無橘。錫類那知有穎封。
滿滿風霜味正肥。厥包萬里逐雕題。封君莫羨傳柑寵。清爽何如楂與梨。
作詩渾似譚經戴。奪盡從頭席幾重。文木一經題品後。虛名不數大夫封。
養生未得仙人術。治病徒尋藥裏題。安得從公橘中隱。細論火棗與交梨。
和安成彭清老五首

山有喬松隰有臺。胸中日月太平開。安車不入申公念。祇恐詔從天上來。

閉戶長吟何水曹。人間富貴九牛毛。博山一縷清香永。餘子不知更幾刀。
鏗鏘金石三千首。吐納雲煙四十年。自有山神回俗駕。不愁大尹觸吟轡。
里中諸老皆公識。破戒相過問故人。願我那能來重客。知公不薄少年新。
公餘几上詩書亂。事簡庭中鴈鶩休。乞我新篇洗凡俗。蕭蕭風雨打牕秋。

送吉州詹守五首

平生兩耳熟龔黃。今日身親識大方。太史若徵循吏傳。一篇氣脈在耕桑。
諫垣禮樂三千疏。牕下詩書六十年。莫訝勾吳留不住。解隨膏雨到江邊。
骨鯁嘉言憶舊臣。故應赴詔近嚴宸。席前若下清明問。且說江南一味貧。
烏龍山下曉風輕。白鷺洲前暮靄凝。今日可能如昨日。廬陵還解似嚴陵。
柏移平地失崎嶇。培塿恩深報一無。惟有依歸意難盡。不堪瀟瀟水循渠。
勸輸租

佃氓輸課稍逡巡。排日呼來不厭頻。認取私家催米意。莫憎門外督租人。
送鄭尙書守建安十首

自從秉節筵明廷。讜論忠言四海傾。何事不關天下念。此心無著世間名。
親奉王明御六龍。合登宰路冠諸公。未應天子青宮友。猶滯黃幡豹尾中。

聞上金華勸講班。啓心長是片言間。一從元祐諸公後。得此淵源自玉山。
春來苦雪夏來寒。南去愁霖北去乾。又報豐年無一事。乞身遠去可能安。
一賢去國四方噴。卻恐猜疑到玉宸。急把丐閒書報下。此行猶足律貪人。
直節亭亭屹不流。沖然襟度更休休。世間多少難平事。可惜先生不少留。
東西一節大江邊。來往勤民亦有年。未必米鹽勞試守。更從根本得深研。
從此褰帷去帝鄉。閭閻辛苦足平章。阜囊若有新豐奏。纔過龍團第一綱。
革履如今遠帝廬。眼前憂念總區區。黃鐘一氣元來在。安得先生起亞夫。
好風佳月滿襟懷。嘗到先生丈室來。今日忽爲江海別。此心肯逐晚潮回。

和張憲吳園山居二首

輕辭綠野逐征夫。踏遍溪山總不如。莫愛畫圖嘗在眼。渠儂還亦愛吾廬。
參天喬木鎮山川。栽種成陰知幾年。仰止名園今老矣。卷舒畫軸思悠然。

和向大夫坐韻并序

致政大夫向公。致政先生楊公。同甲子也。而先生之辰先焉。一日。訪表兄徐思叔大夫。公欲坐先生下。不可。又一日。大夫公有詩堅此約。時侍席者。爭傳以爲此邦一段佳事。皆屬和。雖然。大夫公豈以是爲佳哉。輒次嚴韻道此意。

道義交情不用盟。鳴謙肯作震雷驚。論功平勃非吾事。付與人間仔細評。
謝劉大權爲壽

涼月紛紛弄綵衣。桑弧蓬矢拂庭闈。不因妙語從君得。何事茅簷星斗稀。
壽張京尹十首

岷山斗險介巴江。天地精神此晦藏。已發峨眉清一段。公家父子又相望。
盡心堂上得心傳。妙處機緘共一天。玉骨冰姿更相似。黑頭只欠著貂蟬。
四百山河朝帝京。紫巖有志未全伸。知公久抱中原略。日日搜羅度外人。
納湖千頃自源流。淡淡春風百尺樓。盡出詩書到功業。只今天下矚君侯。
天府何爲屈我公。謾將煩處壓才雄。若兼二輔亦可了。萬化幹旋猶有功。
彈壓殊非翼翼商。藉公惠養破天荒。從今若說京都政。不數前張數後張。
湖而撥開雙眼翳。湖頭拔立一提金。先生能事真如此。捍滌羣邪卽此心。
翁見一笑大歡足。難犬不驚仁意多。欲得使君眞實諦。直須堂外識中和。
餽生何幸倚們牆。千里崎嶇入帝鄉。贏得菊花斟壽酒。今年又近一重陽。
欲頌公侯學魯人。怕衝大尹能長吟。亦知已有長生訣。四益齋中四益箴。

爲張氏題秀盤閣

扶輿磅礴滿清虛。未必山川獨有餘。欲識秀盤無盡處。吟風弄月得吾初。

王文伯將校藝漕闡。通我取別。肯作一夕飲。酒竟猶子留之西齋。厥明文伯有詩。敬廣原韻。已聞鼓篋無秦銳。肯爲論文學賈留。奪我清風俄頃爾。夢回眞若隔三秋。

劉宗元索余賦愚谷。古人以愚自命。及命人者多矣。余不暇辨。姑以二絕言愚之理云。

以愚名谷意何如。肯以愚溪認作吾。天地中間有眞我。蕭然陋巷不關渠。命谷爲愚谷曰愚。人心難似谷心虛。夫君若路歸愚路。坐斷人間毀與譽。

送徐仲洪尉南安八首并序。

開禧乙丑十一月朔旦。表姪徐仲洪作尉南安。以西園伯氏藥石之辭。要余贈言。顧余疲茶如此。安得佳思。要不可已。亦以八絕塞命。然伯氏之言。君臣品也。如鄙語。眞佐使輩耳。若以泄其太過。濟所不及。或庶幾焉。

仲洪作尉南安縣。示我西園藥石辭。莫道近民民易擾。官清民近更相宜。聖朝寬令捷驚霆。尉不留心竟不行。萬事闔端皆在我。安危便可到蒼生。催科莫作擾人看。趁此登場早了官。坐視貪殘敗吾子。不如自放一分寬。若見村中小校師。教將義理訓童兒。四端五品人人有。莫道冥頑不與知。椎牛酌酒是民頑。明約科條墟里間。若更寬他衣食路。桑間陌上自閑閑。

血氣誰無未免爭。腰牛公牘角蝸情。半非半是先須識。但要吾心似水平。
作尉之難是胥尸。一生一死總吾爲。是心倘有分毫歉。脫手翻車悔莫追。
手弓皆是虎狼才。巡徼寧無去復來。條去條來無滯迹。蝗螟雖過不爲災。

